

استغاثات أهالي المعتقلين مارس 2020



عن ا. هدى عبد المنعم



متخيلتش ابدا بعد كل الفترة الطويلة دي اقف ادم معهد الامناء عشان الاقي عربية اسعاف مع حراسة مشددة جدا فيها امي اللي عندها ٦١ سنة واللي بقالي اكرت من ٦ او ٧ شهور ملمحتهاش غير من بعيد بردو لدرجة اني مبقتش عارفة شكلها ايه وهي في منتهى الإعياء لدرجة ان من صدمتي مبقتش عارفة اصوت ولا اجري ولا اعمل ايه لقتني بجري ورا عربية الاسعاف وانا عمالة اناي يا ماما يا ماما يا ماما في ايه يا ماما انت كويسة يا ماما يا ماما ردي عليا وماما بصة ومبتدش بتشاور براسها بس ايه اللي بيحصل معاها وتعبانة ازاي معرفش المحامي طلع قال ماما ماشية على عكاز وفي منتهى الاعياء وانها مصابة بجلطة في القلب واشتباه في ذبحة!!! طيب انا المفروض اتصرف ازاي!!! فضلت واقفة لحد الساعة ٤ ونص عشان المحها وهي خارجة بردو وعربية الاسعاف جت بمنتهى السرعة وانا بجري وبصوت يا ماما يا ماما يا ماما عملوا فيكي ايه يا ماما؟! ومفيش رد! مفيش رد عشان الترحيلة جريت بسرعة تاني للقناطر عشان بردو منعرفش عنهل حاجة احنا بردو لسة منعرفش القرار! كل اللي عرفناه وجع قلبنا بزيادة!!!! بيحصلك ايه يا امي .. بيحصلك ايه يا حبيبتي ..!!!! انا اسفة اني مشوعارفة اسندك واكونلك ظهر زي كل البنات اللي بيقوا ضهر امهم في السن ده !! <http://bit.do/fyjob>

عن معهد أمناء الشرطة

حرفيا ماحدث ف المحكمه النهارده مايعطش ولا ع الاقل مادمعتش عينه من الحزن والقهر واحنا كلنا واقفين ف القاعه اللي كانت مبارك بيتحاكم فيها بس بدل ماكان هو اللي موجود ؛ كان فيه شباب زي الورد دكاتره ومحامين وصحفيين وفنيين واعمار يافعه محبوسه تقهر جوه. لحد الساعه 7 وكان لسه فيه قضايا مااشتغلتش المحامين تعبت والشباب المحبوس كمان تعبوا لدرجة ان الناس ابتديت تريح ف البنشات منظرنا كلنا يصعب ع الوحوش الحيوانيه مش البني ادم ذات نفسه. مافيش لقمة دخلت جوف حد لا جوه القفص ولا بره القفص. ولما حاولنا ندخل اكل ليهم جوه القفص ياكلوا بعد ما سيادة اللوا وافق وكلنا جرينا ع الكافيتريا نجيب علب بسكوت او كيكات او اي حاجه تسند الشباب اللي علي أعصابهم من الصبح مستنين مصبر مجهول نسبيا معروف مسبقا من كتر اللي اتكرر فيهم كل مره. اذ فجأة نلاقي سيادته يقول لا هاندخل ازاي المايه بس لاننا هانشك ف العلب دي لو فيها رسايل. حقيقي كعس*م التخلف العقلي. خافين من رسايل واحنا قدام عينهم بالكاميرات اللي مترشقه ف كل مللي وفوق كل واحد فينا خافين من شباب محبوس لا قوة له وقاعة مليانه محامين لا حيلة لهم خافوا من رسايل حب -ان وجدت اساسا- احتمال نفجر بيها السجون 😊 وسايين الارهابيين الحقيقيين بره يسفوا ف قوتنا وصحتنا. شباب زي الورد بيضيع سنين من عمره ومستقبله يروح قدام عينه بالبطئ. سيد البنا النهارده مابطلش يسأل ع كل الناس بالاسم شخص وشايل هم كل واحد فيهم حرفيا بمعني الكلمه. وكل مانقله -انا واستاذة -Amany Adel فكر ف نفسك عشان تطلع تشوف مصالحهم كان بيقول كلنا ف مركب واحد وانا معاهم هنا ومش هأخرج لوحدي ولو اتكلمتوا ماتتكموش عني لوحدي. اتكلموا عننا كلنا. ووصاني ارجع اكتب البوست الصباحي والمسائي مكانه عشان يأكد ع مبدأه انه مش هايصيب حد ومش هايقدر مايشلش هم حد. سيد بخير ويارب يقوم بالسلامه العمليه بتاعته هاتكون يوم الحد ياذن الله. ربنا ينجيه يارب. كان نفسي اشوف سحر علي. الغصه اللي ف قلبي لكن ماحصلش للأسف ماعرفتش اشوقها عشان وحشتني جدا يارب يكون اخر سجن ليكي وينجيكي منها يااستاذتي. ويعوضك خير محمد وليد ومؤمن عيال قلبي. لسه الضحكه مافارقتش وشهم رغم انها ابتدت تتكسر شويه بس لسه بيعافروا. لسه خرمانين ولسه خربانين وقعدنا نضحك ونهزر اكرت من ساعتين واحنا واقفين ع رجلينا لحد ماتعبوا وناموا ف حضن بعض ع الدكك ف القفص. وانا فضلت واقفه مع سيد اكرت من 6 ساعات وهما يناموا ويصحوا يلاقوني لسه مكاني قدام القفص شابكه فيه بايد دي زي المتضرعين لاولياء الله الصالحين يمكن أحس بدفاهم من ورا حديد ورا ازاز ورا حديد. لا سامعين بعض ولا شايفين بعض بس كنا بنحس ونفهم عايزين نقول ايه بالاشاره لاننا فعلا عاجزين. ماعرفش الكابوس ده هايخلص امتي ماعرفش امتي يظهر العاقل الرشيد اللي يعقل ويوزن الامور ويحقق العدل.

<http://bit.do/fyigG>

عن سولافة مجدي

مش قادره اقول حاجه يا بنتي انا تعبت وبقيت ست مقهوره بقيت اكره يوم التجديد مش عارفه الدنيا مخبي لنا ايه تاني بقيت مكسوفه من العياط والله يا بنتي محتاجه ليكي كل يوم من غيرك بيعدي سنه عليه والعمر ما بقاش في كتير يا ريتني ما كنت جيت وجبتك نعيش هنا يا ريت فضلت في بلدي. بس بصبر نفسي بقول يمكن الي بيحصلنا ده خير انا راضيه بلي كاتبه ربنا وهو شايف ومطلع وقادر يفك الكرب هو اقوه من الكل عمري ما حسيت اني بغربه اد الايام دي. انا بغربه من غيرك ومكسور ومقهوره اد العالم. يارب ردهالي علشان خاطر ابنها. <http://bit.do/fyiwE>




عن الأمهات في الزيارة

امبارح في الزيارة عيطت و دي حاجة محصلتش غير في اول مرة اروح المكان الملعون ده و بعدها دموعي نشفت تماما دموعي غلبتني امبارح لكذا مشهد
1....ام ريفية طيبة لابعده حد قاعدة جنبي في انتظار الزيارة تبدأ كل شويه توسعلى مكان و تظمن ان المكان هيكفى لزوجي يقعد جنبي ولا لا قمة الحنان و الامومة... غصب عنى بقيت عمالة ابص على تفاصيلها و هم الدنيا اللي على وشها و تجاعيد الزمن اللي مبيينة ان سنهها فوق ال 80 و هدموها الجميلة جدا جدا جدا الجلبيات المصرى الفلاحى المنقرضة بسبب هجوم العبايات السوداء على الريف ابنها دخل الزيارة قبل محمد اعتقد انه في اواخر الخمسينات محضنش مراته زى ما حضن امه قعدت تطبطب عليه بشكل كده خلانى عاوزه احضنها انا كمان. عارفة انى حشرية بس و الله العظيم من جمالها ما عارفة انزل عيني من عليها. محمد كالعاده بينزل اخر واحد تقريبا بتغاض منه اوى 😊 و قاعدة مستنية سيادته. اول حاجة ابنها قالها امي متعمليش اكل هاتيلي كيلو خيار كيلو طماطم و كفاية كده متتعبيش نفسك انتي مش حمل مصاريف الحمد لله لقيت محمد جاي من اخر القاعة لاني دقيقتين كمان و كنت هروح اقعد معاها و اعيط
2.... زوجي العزيز جاي من اخر القاعة كل ما يقابل ست مسنة يبوس ايدها و يسلم عليها و يقولها ازيك يا أمي في اللحظة دي قررت اعيط بقى عشان كده كتير على اعصابي
ربنا يدوق كل ظالم ظلمه

<http://bit.do/fyjivV>

عن إسراء عبد الفتاح

ما يحدث في بلد الظلم والقهر .. امبارح كانت جلسة "اسراء عبد الفتاح" خرجوهم من الساعة ١٠ الصبح راجعين الساعة ٢ صباحا من اليوم التالى بدون زجاجة ماء وبدون أكل طبعا ٢٠ واحدة في سيارة الترحيلات... ٢ منهم اغمى عليهم وراحوا بيهم المستشفى يركبوا محاليل وكل ده والباقي ملطوعين بالخارج.... اليوم في زيارة " اسراء" الحمد لله الطابور كان تمام ساعة واحدة انتظار في الداخل ٤ ساعات انتظار 😊😊 عادى مفيش جديد اتعودنا... لا و المشهد المتكرر والقاهر بقى ايه؟؟؟ الزائر اللي جى ل سجين الاموال العامة واخذ بالك انت اللي سارق واللى ناهب وداخل يقضى كام سنة ويخرج يستمتع بما سرق يعامل معاملة البشاوات
١ / مايقفش في الطابور زى الباقي



٢ / مش بيجبروه يركب الطفطف القدر اللي بيجبرونا نركبه

٣ / لاينتظر بالخارج اكثر من ١٠ دقائق ويدخل الزيارة

٤ / يقعد زيارة ساعة ونص. <http://bit.do/fjixS>

عن شادي الغزالي حرب



انهاردة ٦ مارس عيد جوازي ال١٦ انا و شادي...تحديات كتير و صعوبات كتير عدت علينا..تعب و قوة تحمل و صبر و شغل علي استمرار علاقتنا و علي تربية و لادنا بكل التحديات اللي انتوا عارفينها..لكن بكل تأكيد دي اصعب سنة عدت علينا..كل دعائي ان الايام دي تعدي علي خير و تكون دي اخر ايام في فراق شادي عني و عن الولاد و العيلة و الحياة كما عرفناها..يا رب ربنا يقوينا علي تحمل الصعوبات دي و غيرها و يلهمنا القوة و الحكمة في مواجهة الحياة.. <http://bit.do/fyv4d>

أسرة الصحفي عادل صبري تدعو للإفراج عنه



نداء: افرجوا عن #عادل_صبري.. عن سجناء الرأي في إطار مواجهة مخاطر فيروس كورونا، اتخذت وزارة الداخلية اليوم قرارًا بتعليق زيارات المساجين لمدة عشرة أيام "حرصًا على الصحة العامة وسلامة النزلاء"، لكن هل يحد هذا القرار من احتمالية انتشار الفيروس داخل السجون؟ وهل الخطر الحقيقي أصلًا في زيارات الأسر لذويهم المحبوسين؟! لماذا لا تتخذ النيابة العامة قرارًا بإخلاء سبيل المحبوسين احتياطيًا من سجناء الرأي وخاصة كبار السن منهم إنقاذًا لحياتهم؟ إن الخطر الأكبر الذي يُهدد حياة السجناء لا يتمثل في زيارات الأسر لذويهم؛ فهذا عقاب إضافي للسجناء بالحرمان من رؤية أهاليهم، وإنما يكمن في استمرار حبسهم من الأصل في ظل ظروف غير إنسانية تشكل بيئة خصبة لانتشار الأمراض والأوبئة، وهذا لا يهدد فقط باحتمالية نقل العدوى من المساجين إلى بعضهم البعض ولكن حتى إلى جميع المتعاملين معهم.. إنها كارثة إنسانية بكل المقاييس. وإذا أضفنا إلى ذلك أن كثيرًا من المحبوسين سبق وتم إخلاء سبيلهم من التهم الواهية والزائفة الموجهة لهم وتم تعطيل أحكام الإفراج باستحداث تهم أكثر زيفًا لا يزالوا محبوسين على ذمتها؛ فإن استمرار حبسهم في ظل هذا الوباء الذي يهدد الجميع هو جريمة أخرى تُرتكب عن عمد في حقهم. عادل صبري، رئيس تحرير موقع #مصر_العربية، أحد هؤلاء المساجين، وهو محبوس منذ عامين، بعد أن أُلقت قوات الأمن القبض عليه في 3 أبريل 2018، على خلفية تقرير ترجمه الموقع عن صحيفة نيويورك تايمز. استمر تجديد حبس عادل صبري بتهمة "نشر أخبار كاذبة" إلى أن قررت محكمة جنايات الجيزة إخلاء سبيله في 9 يوليو 2018، وهو القرار الذي لم يُنفذ، ففي الوقت الذي كان يقوم دفاعه فيه بإنهاء إجراءات إخلاء السبيل؛ جاءت المفاجأة بإدراجه في قضية جديدة وهي القضية 441، وكانت المفارقة أنها حملت ذات الاتهامات في القضية التي حُكم له فيها بإخلاء سبيله! عادل صبري الآن على مشارف الستين، وصحته تتدهور كل يوم ويعاني من عدة أمراض داهمته من كثرة النوم على الأرض في البرد القارس خاصة آلام العظام والمفاصل، وينام على فراش أرضي لا يتجاوز 55 سم عرضًا و170 سم طولًا، ولا توجد أدنى استجابة طبية لعلاج نتيجة ضعف الإمكانيات الطبية بالسجن، واستمرار هذه الأوضاع غير الإنسانية هي أكبر خطر عليه وليس زيارة ذويه. لقد ظللنا على مدار العامين الماضيين ندعو ونناشد كل جهة وكل مسؤول في مصر الإفراج عن عادل صبري، الصحفي الذي لم يفعل شيئًا يستحق الحبس عليه ساعة واحدة في أي قانون؛ هذه المرة ومن واقع الخطر الذي بات يهدد الجميع تدعو أسرة عادل صبري للإفراج الفوري عن المحبوسين احتياطيًا بلا أي تهم.. وتحذر من العواقب الوخيمة التي يمكن أن تحدث جراء استمرار المحبوسين داخل أبنية مهالكة وظروف احتجاز غير إنسانية وفي ظل إمكانيات طبية ضعيفة للغاية ولا تناسب المرض العادي ناهيك عن الفيروس الفتاك! افرجوا عن عادل صبري.. افرجوا عن المحبوسين بلا تهم.. افرجوا عنا وعنهم..

أسرة عادل صبري

9 مارس 2020

<http://bit.do/fzBKj>

عن شادي أبو زيد

امبارح كان جلسة شادي واتجددله ١٥ يوم في قضية التدوير الجديدة، شادي تم ال ٢٢ شهر مسجون. مش هتكلّم عن القضية الجديدة وظروف الحبس، بس في الوقت اللي العالم كله بياخد احتياطاته للوقاية من فيروس الكورونا، امبارح في النيابة في مكان بالكاد يتسع ل ٣٠ شخص، كان فيه حوالي ١٢٠ متهم/متهمة مع حوالي ٧٠ محامي/محامية ومفيش غير ٢ شبك بحديد وسلك والأنفاس كلها في وش بعض! الناس دي في منهم اللي هيطلعوا بعد الجلسة يقابلوا ناس برة والناس اللي برة هتقابل ناس تانية برة ومخاطر انتشار الامراض هتبقى من سيء لأسوأ وفي وقت قليل جداً! بعض الدول بتفرج عن المساجين بالآلاف اليومين دول وبيمنعوا الاختلاط والزحمة لحد ما الأزمة دي تعدي على خير، واحنا عندنا لسة حابسين بني ادمين بدون تهمة حقيقية في ظروف غير آدمية في الجو ده.. طيب لو مش مهتمين بصحة المحبوسين مش دول بيختلطوا بمخبرين وامناء شرطة وظباط ووكلاء نيابة وقضاة؟ ودول كمان هيختلطوا بعد كدة بناس تانية برة؟ مش هنتكلم في بديهيات زي العدل والرحمة ولا هقول للمليون ان دا مش مكان شادي وان اللي بيحصل فيه حرام، بس اضعف الايمان يبقي في شوية عقل ومنطقية في التعامل مع الوضع الحالي اللي مش بس هيهدد حياة المحبوسين لأ ممكن يآثر بالسلب علي الكل! <http://bit.do/fyR5V>



عن محمد عبد الغني

مساء الخير، محمد ببسلم على أصحابه وعائزهم يكتبوا له جوابات، في ناس أنا مش عارفه هم مين ولا أوصلهم إزاي فهذا إشعار بذلك أنهم يظهرها وعليهم الأمان. يا ريت الى حابب يكتب له ويظمنوا عليه يبعث لي بس. الجوابات الورقية أجمل تواصل ممكن بخط الإيد طبعاً، لكن تيسيراً للمسافات ممكن تصوروا الورقة وتبعثوها لي واحنا هنطبعها. هنجاول من أول الأسبوع ده اننا ندخل الرسائل، ومرحبين بكل حبايبه يتواصلوا معنا، ويأذن الله هنوصلهم رسائله كمان مكتوبة. طول ال ٣ شهور الي فاتوا محمد كان بيطلب يعرف أخبار أصحابه ويبسأل على ناس كتير، و بياكد أنه محتاج يتواصل معاهم جداً، وظاهر لي قد ايه ده هيفرق معاه نفسياً. احكوا له أخباركم واللي بيحصل معاكم برة ودردشوا، حاولوا معنا نخرجه برة دائرة السور شوية ونهون عليه، محدش عارف الغمة هتخلص امتي. وشكراً لكل حد ببسأل علينا وعليه، كل سؤال بيفرق معنا جدا 😊😊 . <http://bit.do/fyR7w>

عن أيمن عبد المعطي

وصلتني رسالة من أيمن النهارده أن عنده كحة جامدة ومحتاج دوا .. ودلوقتي اعرف أنهم علقوا الزيارة للسجون عشان كورونا.. هو ايه القهر والظلم دا! المفروض اطمن ازاي اوصل له الدوا ازاي؟ اعيش حياتي عادي الايام الجاية دي ازاي؟ احنا بيحصل فينا كدة ليه؟

<http://bit.do/fyR9Y>



عن جعفر الزعفراني

ايوه يعني ازاي كده ازاي يعني جعفر في سجن المنيا الحقيير متشدد عليه وممنوع كانتين ومحطوط دواعي من ٨شهور يعني مفيش اكل من ١٦ يوم آخر زيارة و لسه ١٠ ايام منع والله اعلم ايه اللي هيجصل!! انا مطلوب مني اسيب جوزي ازاي من غير اكل ولا دوا ده كله ازاي مطلوب نسكت ومنظمنش عليهم. انا هروح ابات قدام السجن انا مش هسيبه كده. منكم لله
طلعولي جعفر طلعه كفايه حرام عليكم كفايه ظلم وافترا كفايه كده طلعه

<http://bit.do/fyScY>



عن سجن جمصه

خلال الأسبوع الي فات أهالي سجن جمصه كانوا بياكدوا أن في حالات كورونا في السجن والرقم وصل لسبع مساجين. في الوقت الي كانت الخطة المبدئية فيه انهم يتعزلوا في عنبر السياسي آخر دور. طبعاً، محدش كان مستوعب يعني ايه يتعزلوا في عنبر فيه مساجين تانيين أصلاً وفي النهاية، متنقلوش مستشفيات واتعزلوا جوة السجن. قرار وقف الزيارات الأخير بياكد الي نقلوه الناس، وبيقول أن في حالات في سجون أخرى. لكن مبيجاوبش على مصير المساجين بعد منع الزيارة، هياكلوا ازاي مثلا وهم عايشين على زيارات الأهالي؟ هل الكانتين هيوافر السلع الي الأهالي بيشتروها؟ المرضى الي بياخدوا أدوية يومية هياخدوا جرعاتهم ازاي في الفترة دي؟ والأهم، حالة السجن نفسه، في الوقت الي عدد الأفراد في الزنانه الواحدة بيكون في حدود عشرين ولما يوصل ٢٥ بيكون زحمة جدا، عنبر الزراعة فيه ٨٠ سجين في الغرفة الواحدة، كل غرفة تسكينها من ٧٥ ل ٨٠ والجديد بينزل عليهم، العدد ده في زنانه واحدة، مقطوع فيها المياة نصف اليوم تقريبا، حمام واحد، سخان أكل واحد، وطبعاً نضارة (فتحة تهوية) واحدة أعلى السقف. محمد كان بيشتكي من العدد والمشاكل المصاحبه ليه في كل زيارة تقريبا و دور البرد عند واحد كان بيمرض الزنانه كلها. دلوقتي اي واحد نازل جلسة في عربية ترحيلات وطلع نيابة ومحكمة ومفيش أي عنده أي وسائل نظافة شخصية هيرجع يعمل ايه غير انه يرجع يعدي السجن كله؟! الوضع مرعب الحقيقة بدون أدنى مبالغة..

<http://bit.do/fySdu>

بيان من أسرة الدكتور محمد علي بشر

الاثنين ٩ مارس ٢٠٢٠

تؤكد أسرة الدكتور محمد علي بشر، وزير التنمية المحلية السابق، أن التهم الموجهة إليه في القضية المعروفة إعلامياً بمحاولة اغتيال النائب العام المساعد، والمقيدة برقم ٦٤ لسنة ٢٠١٧ شمال العسكرية، هي تهم عارية تماما عن الصحة لوجوده في سجن العقرب شديد الحراسة منذ ٢٠ نوفمبر ٢٠١٤، أي قبل حدوث الواقعة. الأمر الذي يستحيل معها عقلا أو قانونا مشاركته فيها لانقطاع الاتصال بينه وبين العالم الخارجي منذ تلك الفترة، فضلا عن الزيارات التي كانت تتم بشكل غير منتظم في تلك الفترة من خلال حاجز زجاجي وهاتف مراقب.

وتشدد الأسرة على أن سمعة الدكتور محمد علي بشر كشخصية مرموقة على الصعيدين المحلي والدولي بعيدة كل البعد عن العنف بكافة صوره وأشكاله. وتشير إلى أنه لم توجه إليه أية اتهامات لمدة أكثر من عام كامل منذ يوليو ٢٠١٣ وحتى نوفمبر ٢٠١٤ وكانت كل رموز السلطة والمعارضة يشهدون له بالاعتدال والبعد عن العنف، وهو ما انعكس في التصريحات الرسمية وغير الرسمية المنشورة في وسائل الإعلام.

كما تندد بحرمانه من حقه القانوني في إخلاء سبيله بعد قرار محكمة جنايات القاهرة بالإفراج عن دكتور محمد علي بشر، وهو القرار الصادر في نوفمبر عام ٢٠١٧. وتستنكر الأسرة إحالتة للمحاكمة العسكرية وحرمانه من قاضيه المدني الطبيعي



الذي قرر إخلاء سبيله قبل الزج به في تهمة مزيفة. وتبدي الأسرة بالغ القلق عليه وعلى صحته في ضوء انقطاع أي تواصل معه بعد منع الزيارات منذ أكثر من عامين بداية من مطلع عام ٢٠١٨ وحتى الآن. <http://bit.do/fySep>

عن ا. محمد الباقر

باقر مش بيخرج تريض من أول ما اتسجن .. يعني أكثر من ٥ شهور جسمه مش بيشفو الشمس يومياً لمدة ساعة صباحاً وساعة مساءً زي اللايحه ما بتقول .. يعني قاعد في زنزانة خرسانة واسمنت ورطوبة عاليه وبدون ما يستحمى بماية سخنة أو يقدر يغسل هدومه أو أطباقه بماية سخنة .. وممنوع من القراءة ومن الجوابات اللي بتأثر على صحته النفسية وبالتالي بتضعف مقاومة جسمه .. وكل ده عادي؟؟؟ وكل ده مش هيضر بصحته البدنية والنفسية؟؟؟ لكن زيارة أهله ليه هتأذيه؟؟؟ طب اعملوا اختبار للأهالي قبل ما يدخلوا الزيارة! لكن ما فيش أسهل من المنع، عشان همه أقل من البشر، فجأة ما يقدرش يظمن على أهله، والي هيعمل عملية مش مهم يظمن عليه، ووالدته اللي بتعيط شبه يومياً مش مهم يظمن عليها، خلي القلق ياكله يومياً وهو معزول بدون جوابات وتليفون وجرايد ورايو .. خليه يضرب ودع من جوازنازته ويفتح المندل .. عشان يظمن على أهله ويعرف إيه اللي بيحصل في الكوكب .. حقيقي بنعيش مشاهد من أفلام درامية سوداوية حرفياً كل يوم.

<http://bit.do/fy49m>



عن ا. سيد البنا

للمحامين زملاء المحامي سيد البنا ونقابة المحامين أنتم فين أخويا المفروض بقاله حوالي سنه ونصف من سنه حالته الصحية تعبانه ولماخذ قرار بالعملية من 17 فبراير كل مره يروح المستشفى يرجع في نفس اليوم بالتأجيل يعني رجح الأحد الماضي بتأجيل أسبوعين إيه سبب التأجيل معرفش. مع العلم لناس هونت الأمر وقالت أكياس دهنه والله هي أكياس عدد ثلاثة في ظهره وواحد في كتفه كبر لحجم البرتقالة وكمان عملية في جنبه فتح جراحي وتركيب شبكه والأمر لما يبقى بسيط في الأول بكثر الإهمال بيكبر لا قدر الله

ثانياً تعليق الزيارة عشرة أيام عشان التجمعات وبالنسبة للغرفة ال عايش فيها 24 ساعة فيها 16 نفس بشرية 16 بنى آدم مرصوصين جنب بعض ده مش تجمع. ده آخر زيارتين كان عنده دور برد شديد وعطس وكحة شديدة وانا قاعدة معاه في

الزيارة كنت المفروض بكره أروح واجيب له علاج البرد ودواء للكحه واطمن عليه لأ مفيش ومفيش اى حد يطمننا عليه خلال 10 أيام لأ مفيش واحنا نعيش إزاي الأيام دى من غير ما نعرف حالته وصلت لايه. على فكره هو عمره ما اشتكى. لكن أنا اخت قلبها وجعها وخايفه على اخوها. إحنا دلوقت في أزمة فيرس مع تجمعات مرصوصة يعني لا متر ولا ربع متر. أرجوا من زملائه المحامين نقابة المحامين ال بيتنافسوا على مقاعد النقابة بالمطالبة بحق العلاج وعدم التأخير فيه . المطالبة بتقليل الأعداد في غرف المعتقلين. والمطالبة بإخلاء سبيلهم على ذمة القضية. إحنا في أزمة ودى مسألة حياة أو موت. كله بقدر الله علينا كلنا لكن ناخذ بالأسباب يا جماعة مترمنيش في التهلكة وتقول كنا نعمل إيه. اعملوا حاجة طلبات أنا معرفش لكن دى حياة بشر. أنا اخت معتقل سياسى (سجين رأى) <http://bit.do/fy47J>



د. ليلي سويف

أنا ماليش دعوة بالنوايا ولا بالتصورات النظرية اللي مالهش علاقة بالواقع. تعليق الزيارة في السجون هو تكدير وبس، من غير زيارة المساجين بتجوع، من غير زيارة المساجين مش بتلاقي دواء ولا علاج، من غير زيارة أي انتهاك ممكن يحصل للمساجين في أي لحظة. احنا مش بنتكلم عن مسجون أو عدد من المساجين ممنوعين من الزيارة وباقي السجن بيزور، احنا بنتكلم عن منع الزيارة عن الجميع في وقت واحد. شوفوا اللي حصل واللي بيحصل في العقرب (شديد الحراسة 1 بمنطقة سجون طرة) ووضع المساجين فيه، ده حبيقي وضع الكل.

#لا_لتعليق_الزيارة_في_السجون <http://bit.do/fy5hw>



عن جعفر الزعفراني

يارب تكون بخير يا جعفر ربنا بيعت لك ناس رحيمة تهون عليك ، يارب يفتحوا لك الكانتين ويسمحوا باكل وشرب ودوا ليك. حسبنا الله ونعم الوكيل في اللي ظالمك. حد يعرف حد في سجن ليمان المنيا يطمني على جعفر يقولهم يخلوا في قلوبكم رحمة كفايه ظلم بلله عليكم. دخلوله اكل وشرب بقاله ٨ شهور مقفول عليه في الدواعي بدون سبب واللي ميعرفش مين جعفر.. جعفر معتقل حكم عليه بالمؤبد فقط لأنه تصادف وجوده في مكان تم مهاجمته من قوات الأمن. تم اعتقاله في 2013 في القضية المعروفة إعلاميا بخلية الجيزة القضية اللي مافيش فيها احراز أو قتل أو شبهه قتل حتى ولكن فقط إتهام بالانتماء لجماعة محظورة أسست على خلاف أحكام القانون والدستور القضية كان فيها 26 شخص أصدر فيها القاضي ناجي شحاتة والمعروف بقاضي الإعدامات 11 حكم بالإعدام وكانت عقوبة 15 شخص هي الأشغال الشاقة المؤبدة ومن ضمنهم جعفر اللي مر على اعتقاله 7 سنوات # . الحريه_لجعفر_الزعفراني

<http://bit.do/fy5pH>

عن علاء عبد الفتاح

دخلنا الأكل ومستلزمات النظافة لعلاء، وطبعاً مافيش زيارة المسؤولين عند بوابة منطقة طرة كانوا غاية في الذوق معنا ... السؤال بقي الشخص اللي اخذ القرار ده ونزله بالباراشوت على دماغهم ودماغ الاهالي قاعد في انهو مكتب؟ وشاف السجون في اي ظروف عادية ماهياش مهرجان الكباب اللي بيعملوه!؟

#لا_لتعليق_الزيارة_في_السجون

<http://bit.do/fzBC9>



منى سيف

كان ممكن تاخذوا قرار بإخلاء سبيل الالاف المحبوسين في قضايا رأي وقضايا سياسية وكل اللي متجاوزين مدد الحبس الاحتياطي ومش المفروض يبقوا في السجن. كان ممكن تاخذ قرار بإخلاء سبيل كل الاطفال المعتقلين في اماكن احتجاز مختلفة. يرجعوا وسط اهلهم ولو وفرتلهم فحوصات طبية يبقى كتر خيركم كان ممكن تاخذ قرار بمد ساعات تسجيل ودخول الزيارة عشان الناس ما تتكربسش في طواير برة، وتقف تستقبل الناس بكمامات وجوانتيات كاجراء احترازي وطبعاً كان ممكن تسمح للمساجين بالجرايد والراديو فيبقوا فاهمين حجم الموضوع معنا بدل ما انت رايح تسك عليهم بالضبة والمفتاح وتقولهم مافيش



زيارات اصل فيه وباء برة وتقفل عليهم وتسيبهم لكل المخاوف والكوابيس الممكنة على عائلاتهم وحبائبيهم. كان ممكن حاجات كتير لو اللي بياخدوا القرارات دي بني ادمين. #لا_لتعليق_الزيارة_في_السجون <http://bit.do/fzBEp>

قرار تعليق الزيارات في كل السجون قرار عقابي وفيه استسهال.

ناس كتير مش هتبقى شايفة ده فتعالوا نفككه في نقط

١- أولا كتير من اللي في السجون اصلا مش المفروض يبقوا في السجن، وما فيش أي داعي لحبسهم ولا بيمثلوا أي خطر على المواطنين. وبالتالي لما يحصل ظرف طارئ زي موضوع انتشار فيروس الكورونا، المفروض الناس دول يخلى سبيلهم على طول.

٢- سجون مصر معروف عنها تردي الظروف والاحوال الصحية فيها، إما لأن المسؤولين عن السجون بيقرروا يمنعوا العلاج أو الرعاية الصحية عن المساجين، أو لضعف الامكانيات في اغلب السجون. فازاي سجون بيموت فيها كل شهر ناس بالإهمال الطبي او المنع المتعمد للرعاية الطبية، المفروض نأتمنهم على صحة مئات الالاف من المساجين هيتعزلول تماما عن اهلهم في سجون كل المحافظات؟!

٣- اللي الدولة بتدعيه ان ده اجراء احترازي لمدة ١٠ أيام "خوفا على صحة النزلاء وذويهم". ازاي ما فيش أي اجراء مماثل اتخد في اماكن تجمعات بشر زي المترو والجامعات والمدارس والميادين الكبرى ومواقف المواصلات ومحطات القطار والمطارات وكل الاماكن السياحية؟ طب بلاش خلينا في السجون. هل ده معناه انكم هتتعزلوا كل القوة الامنية من اكبر ضابط لأصغر عسكري، كل واحد في السجن اللي بيشتغل فيه لمدة ال ١٠ ايام دول بدون تواصل مع العالم الخارجي؟ يعني مأمور السجن ورئيس المباحث والضابط -الخفي- بتاع امن الدولة اللي بيدير السجن بشكل غير رسمي والموظفات والموظفين اللي متولين الاعمال الادارية والمسؤولين عن التفتيش كل دول هيلزموا السجن ١٠ ايام وما يروحوش بيتهم خالص؟ اشك

طب ما دول هيخرجوا في الشارع وهيحتكوا بناس وهيروحوا يقعدوا في وسط عائلاتهم ويرجعوا السجن تاني.

فين ال lock down بقي والعزل ده؟!

٤- بشكل خاص بالنسبة لسجن شديد الحراسة ٢

أولا: السجن ده علاء اتعرض فيه لتعذيب وتنكيل بالممارسة المعروفة شعوبيا ب "التشريفة". طبيب من أطباء السجن حضر الفقرة دي وعلاء بيتضرب وهو متغمي ومقلعينه -اسمه اسماعيل غالبا بس مش عارفين نتأكد- ازاي المفروض ده يبقى طبيب نظمن انه هيشرف على صحة علاء وباقر وحامد والقصاص وابراهيم متولي واحمد بدوي وسيد مشاغب وكل معتقلي السجن ده؟!

ثانيا: علاء ممنوع تماما من التريض من اول ما دخل سجن شديد الحراسة ٢، يعني علاء بقاله تقريبا ٦ شهور ما تعرضش للشمس. وده حال اغلب مساجين السجن ده. متخيلين شهور او اكثر ما بيتعرضوش لشمس وهو نضيف، ما بيحركوش جسمهم ومساحتهم محدودة كل واحد في زنزانتة، قادرين تتخيلوا اثر ده على صحتهم الجسدية والنفسية وبالتبعية على مناعتهم؟! ازاي نتصور ان دي كلها ظروف المفروض نظمن للدولة انها هتراعيهم فيها وتقدملهم افضل رعاية ممكنة؟

ثالثا: علاء وباقر وحامد ممنوعين تماما من لحظة حبسهم من الجرايد والراديو وأي وسيلة لمتابعة الاخبار وفهم مستجدات العالم -غير الزيارة - تخيلوا لما فجأة يتقالهم "الزيارات اتوقفت عشان فيه وباء برة" وقع ده عليهم هيبقى ايه؟ حالة الهلع وهم مش فاهمين حجم الموضوع ولا تأثيره ولا انتشاره ولا اهلهم عاملين ايه؟!

وأصلا بقي: انتو فارضين علينا زيارة علاء من وراء ازاز. عدوى ايه وزفت ايه؟!

اللي اخذ القرار ده لا مسؤول ولا بني ادم والاصرار عالتهامل مع المساجين على انهم بضاعة متخزنة مش بني ادمين ده اداء منحط جدا. اللي اخذ القرار ده بالتاكيد مش فارق معاه صحة المساجين، لكن فارق معاه ما يتعشب نفسه في اجراءات او احتياطات تستجيب للظرف الملح بس ما تحرمش بني ادمين من حقوقهم، وطبعا مكسب له ان لو حصل اي حاجة في السجون يبقى فيه تعتيم كامل عليها.

#لا_لتعليق_الزيارة_في_السجون

<http://bit.do/fzBDw>

عن رامي شعث

بعد قرار وزارة الداخلية ، لم يسمح لنا السجن بالدخول للزيارة اليوم. كما انهم لم يسمحوا بدخول معظم الطعام ولا الملابس النظيفة، لم تسمح الإدارة حتى بدخول الخضراوات الطازجة والفواكه. منع السجناء من الطعام الصحي والملابس النظيفة لن يساعد في محاربة فيروس #كورونا. من أجل سلامة السجناء ، نطلب الوزارة بإطلاق سراح جميع من هم رهن الحبس الاحتياقي دون تهمة أو محاكمة.

#افتحوا_احنا_بنموت

#خرجوا_المساجين

#الحرية_لرامي_شعث

<http://bit.do/fzBHd>



عن ا. محمد الباقر

التوصيف الي عمال يزن على دماغني دلوقتي "مدفونين بالحيا" .. إنك تمنع باقر وغيره من اللبس الشتوي (إلا الأطقم الداخلية) والمراتب والمائة السخنة .. وتحبسهم في أوضة خرسانة بدون زيارة ولا تريض ولا راديو ولا جرايد ولا جوابات .. كأنهم موتى أحياء .. بياكلوا لو فيه أكل .. وببشربوا لو متاح .. وبيناموا لو عرفوا من البرد والمطر والرياح اللي بتاكل في جسمهم .. واحنا عاجزين تماماً عن أي فعل .. وعدينا حتى مرحلة اقناع ذاتنا بان الطبطة وشوية المواساة في الزيارة يعتبروا فعل .. ووصلنا لمرحلة عدم الفعل التام .. وتحولت فكرة إننا نضمن بس عليهم حلم وطموح .. كأنهم تقطعت كل صلاتهم بالحياة الدنيا .. ما عدا النفس بجذ آسفة يا

محمد .. ما كنتش متخيلة إني هبقي عاجزة للدرجة دي#الحرية_لباقر

<http://bit.do/fzB7S>



عن ا. هدى عبد المنعم

اقل حقوقنا الانسانية اننا نضمن على ماما في الجو ده يارب صبرنا يارب .. ♀ ♀ بتخيل لو زنزانته في دور ارضي ولا تحت ولا بيحصلها ايه يارب هون يارب احفظها يارب طمنا يارب .. ادعوا لماما بالله عليكم .. متنسوناش من دعاءكم

<http://bit.do/fzB8T>

عن محمد عبد الغني

هو الحقيقة قلقنا على أولادنا المحبوسين -احتياطي- جاد وحقوقي ومحتاج حد يحترمه ويحترم مسؤوليتهم. أخويا الي في زنزانه عالمحارة متكدسة أربع اضعاف سعتها وفيها ٨٠ واحد. المياة قاطعة فيها نصف اليوم والناس بتبدل النوم عالفريشة الواحدة (البطانية الميري)، وحمام واحد للعدد ده كله، و طبعا مفيش داعي للكلام عن النظافة أبداً فضلاً عن التعقيم؛ لما يتعب هيتعاملوا معاه إزاي؟ ايه الإجراءات الي هتحافظ على حياة الآلاف دول؟ #Free_Abdulghani !

#الحرية_لعبدالغني

<http://bit.do/fz2wX>

عن زياد العليمي
واقفين قدام باب السجن. رفضوا ياخذوا الاكل. سمحوا فقط بدخول الادوية وفلوس الأمانات
<http://bit.do/fBkYZ>

منى سيف
امبارح في طرة قطاع ب، اهالي راحو يدخلوا اكل ومنظفات، اخدوا الاكل ورفضوا المنظفات. النهاردة ماما راحت تدخل
اكل ومنظفات، اخدوا المنظفات ورفضوا الاكل وقالوا ده عشان العدوى. هيجنونا والله. مستوى من التخبط والقرارات
بتتغير ما بين ساعة وساعة مش هينتج منه اي حاجة غير انهم هيجنونا
<http://bit.do/fBk5s>

إسراء الطويل
دلوقتي أنا قدام السجن (طرة) ورفضوا دخول كل شيء (الأكل والمنظفات) ماعدا الفلوس وأدوية محددة. كان معايا علبة
دواء (فيتامين) الطاباط فضاها على الترابيزة قدامه وجه يقلب في التابلتس بإيده ! قولتله اتفضل منديل! وبعدين بيظمني
ويقولي ماتقلقيش كلهم كويسين جوه وعندهم كل حاجة!!!#خرجوا_المساجين
<http://bit.do/fBk7i>

أسر معتقلين يروون تجاربهم في إدخال الأكل ومواد النظافة والأدوية لأبنائهم بعد قرار منع الزيارات عن السجن 10 أيام



روت أسر عدد من المعتقلين في قضايا سياسية، تفاصيل محاولتهم إدخال طعام وأدوية ومستلزمات نظافة إلى ذويهم في
أماكن احتجازهم، لحين الانتهاء من قرار تعليق الزيارات لمواجهة انتشار فيروس كورونا.
وقالت الكاتبة الصحفية إكرام يوسف، والدة المحامي المعتقل زياد العليمي، صباح اليوم الأحد، إن إدارة السجن رفضت
إدخال أي أكل للسجناء.
وكتبت إكرام على حسابها قبل قليل: "واقفين قدام باب السجن. رفضوا ياخذوا الاكل. سمحوا فقط بدخول الادوية
وفلوس الأمانات."

يذك أن زياد العليمي محبوس احتياطيا على ذمة القضية رقم 930 لسنة 2019 حصر أمن دولة عليا، والمعروفة إعلاميا
باسم قضية "تحالف الأمل"، بالإضافة إلى صدور حكم بحبسه سنة في اتهامه بنشر أخبار كاذبة.
فيما قالت منى سيف، شقيقة المعتقل السياسي علاء عبدالفتاح، إن والدتها الدكتور ليلي سوييف، ذهبت صباح اليوم
لإدخال أكل ومنظفات لابنها علاء في محبسه، ولكن إدارة السجن رفضت السماح بدخول الاثنین معا.
وكتبت منى: "امبارح في طرة قطاع ب، اهالي راحو يدخلوا أكل ومنظفات، اخدوا الأكل ورفضوا المنظفات، واليوم والدتي
راحت تدخل أكل ومنظفات، اخدوا المنظفات ورفضوا الأكل وقالوا ده عشان العدوى."
وأضافت منى، عبر حسابها بموقع التواصل الاجتماعي "فيسبوك": "مستوى من التخبط والقرارات تتغير ما بين ساعة
وساعة مش هينتج منه أي حاجة."
وألقت قوات الأمن القبض على الناشط علاء عبدالفتاح في 23 سبتمبر الماضي، وأدرجته نيابة أمن الدولة العليا متهما
على ذمة القضية رقم 1356 لسنة 2019 حصر أمن دولة.

وجاء القبض على علاء عبدالفتاح بعد أشهر من إطلاق سراحه بعد قضاء عقوبة الحبس في قضية مظاهرات مجلس الشورى، حيث كان علاء يقضي يوماً 12 ساعة في المراقبة داخل قسم الشرطة.

وروت نعمة هشام، زوجة المحامي الحقوقي البارز محمد الباقر، تفاصيل زيارة شقيقته له في محبسه لتسليم الأكل وملابس نظيفة ومواد للتنظف الشخصية، والتي فوجئت بسلسلة من المنع حتى مع قرار تعليق الزيارات. وقالت نعمة، إن "شقيقة الباقر راحت تسلم في الأمانات الشنطة المسموح بيها كبديل للزيارة وتكفي المفترض لمدة أسبوع، لكن فوجئنا بإجراءات تؤذي الصحة بدل ما المفروض نظرياً إنهم حالياً يحافظوا على صحتهم أحسن يتعدوا من أهلهم."

وأضافت نعمة: "أي منظفات سائلة لليدين أو غير سائلة وأي أدوات نظافة شخصية زي الليفة وفرشة الأسنان ممنوعة، أي فاكهة أو خضار لتزويد المناعة شبه ممنوع، بالعافية دخلنا ٢ طماطم و٤ خيارات و٢ برتقالة و٤ موز و٤ ليمون." وتابعت: "كل لبسه الداخلي وفوطته اللي كانوا بيتغسلوا اترفض إننا نرجعهم، بالرغم من أن أخته اتحايلت كتير إن كدا هيكون عنده نقص رهيب في الملابس الداخلية وده هياذي صحتي، وإن منع الزيارة حصل فجأة فحتى ما اخدناش فرصة نرجعه ملابسه الداخلية."

وفيما يتعلق بالأدوية المصرح لباقر بالحصول عليها في محبسه، قالت الزوجة: "اتوافق على دواء واحد فقط من أدويته والباقي المكتوب في رويته دكتور السجن واللي بيدخله بصورة منتظمة اترفض دخوله."

أيضا المحامية نورهان حسن، شقيقة الصحفي المحبوس احتياطياً محمد حسن، روت قصة منع أسرته من إدخال بعض المواد والمستلزمات اليوم، بديلاً لمنع الزيارات.

وقالت نورهان: أهلي راحوا يدخلوا طبليية فيها غيار واحد نضيف بس واكل وليمون وخل امي راجعه مقهورة والاكل الي سهرت عمله رجح كله والهدوم كمان ما اخدوش الا الفلوس وكام شريط دوا وكل حاجة رجعت وامي وابويا رجعوا مقهورين."

وأضافت: "مانعين عنهم الزيارة خايفين عليهم لكن لما نمع الدوا والاكل النضيف واللبس النضيف عنهم كدا بنحميهم كسرت قلوب الامهات دي وقهرتهم مين المسئول عنها، مش كفاية حبسينهم ظلم ومانعين اهاليهم عنهم بجد الي بيحصل دة حرام."

يذكر أن وزارة الداخلية قررت في 9 مارس الجاري، منع الزيارات عن المساجين لمدة 10 أيام، كجزء من الإجراءات الاحترازية التي تتخذها الدولة لمنع انتشار فيروس كورونا.

وعلى الرغم من اختلاف القضايا المحبوس على ذمتها المعتقلين المذكورين، وأيضاً اختلاف مواعيد القبض عليهم، إلا أنهم جميعاً يواجهون نفس الاتهامات وفق قانون الإرهاب.

والاتهامات هي، مشاركة جماعة إرهابية مع العلم والترويج لأغراضها، وإساءة استخدام وسيلة من وسائل التواصل الاجتماعي "فيسبوك"، ونشر وإذاعة أخبار وبيانات كاذبة لتشويه سمعة مصر.

<http://bit.do/fBmCL>

عن هشام فؤاد

رجعنا من زيارة هشام وللأسف رفضوا يدخلوا اي اكل او فاكهة او معلبات وسمحوا بوضع الفلوس في الامانات واخذوا الادوية بس وبالعافية سمحوا بدخول الملابس الي بناخذها ونغسلها ونطهرها بحجة انهم بيحافظوا عليهم من كورونا مش كفاية منعتوا الزيارة كمان بتحرموهم من اكل نظيف ولو زاي مبتقولوا انكم بتنفذوا التعليمات للحفاظ عليهم طب انتم بتدخلوا وتخرجوا وبتحتكوا بيهم ولو واحد منكم جالوا كورونا هينقل ليهم العدوى منع الزيارة مش حل كفاية بهدلة وقرف ومتوجعوش قلوبنا عليهم الحل انهم يخرجوا خصوصاً انهم محبوسين احتياطياً على ذمة قضية فشنك.

<http://bit.do/fBmdS>



حرام عليكم ده حتى العمل بالمحاكم اتعلق والزيارات اتعلقت، كل علاقتنا بالناس اللي جوا انحصرت ف إننا بنسيب أكل وفلوس ع بوابات السجون! خرجوهم ولحد ما تخرجوهم اسمحوها حتى بتليفونات ليهم عشان نطمئن عليهم يعني ايه التواصل منقطع تماما #فيه_وباء_خرجوا_السجنا

<http://bit.do/fBmpZ>

عن المختفين

والمختفين قسريا وضعهم ايه في الظروف ده لا زيارة ولا علاج بيدخل ولا عارفين في هدموم ولالا ولا أدوات وقائية ، والزنازين القابعين فيها لشهور وف منهم لسنين أكيد مبيتعرضوش لأشعة الشمس ولا بيشموا هوا نظيف حياتهم في خطر ده غير إن الطباط داخلين خارجين لو واحد فيهم مصاب بالمرض يبقى كلهم معرضين للإصابة ولو حد فيهم جواله حاجة مش هيتم الكشف عليه بالتأكد ومفيش حد هيعرف عنهم أي حاجة...

وال 4 أطفال المختفين مع اسرهم زي فاطمة وعائشة وعبدالرحمن اللي تم تسليمهم لمصر في 2018 مع والدتهم مريم رضوان ومن وقتها مفيش أخبار عنهم ، والبراء عمر أبو النجا اللي تم القبض عليه مع والدته منار أبو النجا ووالده عمر أبو النجا في 2019 ومن وقتها مفيش أي أخبار عنهم ، أكيد الأطفال ده حياتهم وصحتهم عرضة للخطر في الوضع والمكان المظلم المجهول.

#خرجوا_المختفين

<http://bit.do/fBmFk>

ابنة معتقل

يُحذرون كبار السن من الاختلاط بالعامية وتجنب التجمعات لأنهم الفئة الأكثر عُرضة للإصابة بالفيروس. بابا تجاوز الستين عامًا منذ عامين، معتقل في أسوأ السجون سجن المنيا شديد الحراسة يفتقر لكل أنواع النظافة، الطعام كان يفتش باليد مباشرة وأحياناً بمعلقة قذرة وهذا طعامنا، فما بال تعيين السجن! الزنازة متكدة بأربعين فرد، لا يخرجون للتريض، لا يتعرضون للشمس، ليس هناك سبيل لرفع مناعتهم، لا من طعام ولا من دواء. بابا مريض قلب حبيبي مناعته ضعفت جدًا فترة اعتقاله، يارب ارحم ضعفه ولا تُرينا فيه سوءًا أو مكروهًا.

<http://bit.do/fBmRb>

عن خليل عبد الحميد

انا حقيقي مش عارفة أسيطر على قلبي وخوفي أخر رسالة كان خليل باعتها إنه تعبان جداً ودرجة حرارته عالية وطبعاً بعد منع الزيارات مفيش أي خبر عنهم يطمنا ولا أكل ولا أدوية ولا لبس بيدخلوا .. مش عارفين نطمئن عليهم ولا على صحتهم والأيام اللي فاتت والبرد والخوف وسؤال ياتري هو عامل ايه دلوقتي ؟ أنا خايفة فعلاً ، أحنا مش بنطالب بحاجات كثيرة، أحنا بنطالب بخروجهم ، لأنهم لحد دلوقتي مفيش تهمة حقيقة .. تهمة بدليل !!!
القلق والخوف عليهم كبير .

<http://bit.do/fBnaE>



في الوقت الي الناس بتطهر بيوتها وبترتب حياتها على قعدة البيت مع النت والأكل والتليفزيون والتليفونات والحرص على نظافة كل شهر فيه. احنا، والي زينا من أهالي السجناء مرعويين تماماً. الزيارة الي اتمنعت عشر أيام اتمدت فترتها-لأجل غير مسمى طبعاً- زيارة الطبلية (الأكل والمستلزمات الي بندخلها اسبوعياً يعيش منها المسجون) اتمنعت النهاردة تماماً، الأدوية الضرورية والمزمنة بيدخل جزء ويتمنع جزء منها والموضوع نسبي تماماً من مفتش لمفتش ومن سجن لسجن رغم التعليمات بدخول الأدوية. كل المسموح هو الفلوس فقط الي بتتحول لبونات يشترها بيها من الكانتين أي حاجة بأضعاف سعرها، والتمتع في كانتين السجن بسكوتات وسجاير ومياه في الأغلب فقط. و هنا بيكون ابننا اتعزل بالفعل تماماً عن العالم ومفبش أي وسيلة تواصل أو اطمئنان عليه ولا اي آلية معلنة للحفاظ علي حياته كمريض حساسية صديرة، يعني أول فئة معرضة للفيروس كمريض جهاز تنفسي زيهم زي المسنين تماماً. جلسات المحاكم والنيابة اتمنعت للحفاظ على الطاقم القضائي وده تصرف منطقي تماماً، طيب والطاقم الإداري بالسجن من ضباط وأمناء ومساعدين ومعاونين الي بيخرجوا ويدخلوا ويلمسوا كل حجر في المكان برة وجوة العنابر؟ طب الأعداد المتكدسة في الزنازين توصل ل ٨٠ فرد في مقر احتجاز أخويا، هيتخففوا ازاى؟ طب السجناء هيحافظوا على نظافتهم ازاى مع منع المنظفات؟ باكو البسكوت والشاي - الي بقي كل الأكل الي هيعيش عليه- الي الأمين هيجيبه من الكانتين اتعقم قبل ما يوصل لإيد السجين، طب اتعقم قبل ما يتحط مكانه ويبيجي من برة؟ ضمنا انه ملمسش اي بورة فيها عدوى؟ بعد كل ده ضمن المسجون نفسه انه هو ملقطش العدوى من أي شيء تاني جوة الزنانه ازاى؟ الزنانه لو افترضنا تعاون المسجونين ونضفوها مرة بكل ما تبقى في الغرفة؛ هيستمر التطهير كل ٢٤ ساعة ازاى وده عمر الفيروس على الأسطح؛ المصلحة هتقدر ازاى تعقم المكان والمساجين نفسهم جواه ؟ ممكن حد يجاوب على التساؤلات الطبيعية كأهالي دي؟ هنعافظ ازاى على حياة الناس في أكبر تجمع مغلق لا ينفذ ليلاً نهاراً في مصر؟

<http://bit.do/fBm3t>

زيارة

الصبح وأنا قدام السجن شوفت ٣ أمناء شرطة بيتفوا على الأرض وواحد بينف على الأرض مش في منديل. و أمين الشرطة اللي كان بياخد أمانات (الفلوس) سجن الاستقبال كان لابس كامامة، جم اتنين زمائله يسلموا عليه قام منزل الكامامة وسلم عليهم باليد وباسوا بعض وبعد ما سلم عليهم رجع الكامامة تاني على وشه. وفيه أربع ظباط كانوا بيسلموا على بعض وفيهم عمداء معديين ٥٠ سنة. غير الظباط اللي كنت بسلمه علبة الدواء عشان عمر ودار بيننا الحوار التالي:

الظابط: دا أمينو مش هدخله

أنا: لا حضرتك دا فيتامين لتقوية المناعة ممكن تقرأ اللي عليه (طبعاً هو ما بيعرفش يقرا انجليزي اساساً فقرأته اللي عليه وترجمته)

الظابط بيفتح العلبة المتبرشمة وبيقولي هاتي كيس عشان افضيه فيه

قولتله معيبش كيس وروحت ادور مع الأهالي على حد معاه كيس عشان الظابط عايز يشوف العلبة المتبرشمة فيها ايه جبت الكيس وحطيت فوقه مناديل وهو فضي العلبة على المناديل وبيمسك التابلتس بإيده!!

قولتله حضرتك بتعمل ايه أنا هعرف منين لو عندك الفيروس ولا لا اتفضل منديل اهو (ورميت قدامه التابلتس اللي مسكها بإيده)

قاللي ما حنا عندنا الجهاز اللي بيكشف على الفيروس

قولتله حضرتك قصدك على جهاز كشف الحرارة وواضح انك ماتعرفش ان ممكن تبقى حامل للفيروس وما يظهرش عليك أعراض اصلاً!!! وأنا قلقانة جدا على عمر عشان واضح أن محدش هنا فاهم المفروض التعامل مع الفيروس يبقى ازاى

وبتسلموا على بعضكم كلكم عادي وحتى حضرتك مسكت الدواء بإيدك قام قاللي اطميني هم كويسين جوة واحنا معقمين المكان. وأنا مطلوب مني اصدقه طبعاً!! يا جماعة الفيروس دا مش هتتعاملوا معاه بالمسدسات والأوامر والله وهيخاف

منكم ويجري!!! العقلية دي هتودي كل اللي في السجن سواء موظفين ولا ظباط ولا مساجين ورا الشمس!!

دا حتى ماعملوش اي حملة توعية للظباط ولا عندهم فكرة عن حاجة اصلاً!!!

#فيه_وباء_خرجوا_السجناء

#خرجوا_المساجين

<http://bit.do/fBnrs>

عن شادي أبو زيد

والله مجهودات الدولة اللي بيعملوها للوقاية او العلاج من فيروس كورونا مجهودات مش قليلة وأنهم بيحاولوا بقدر المستطاع يسيطروا على الوضع وعلى بلد كبيرة بالعدد ده زي مصر ربنا معاها والله يكون في عونهم، واحنا ك مواطنين بنحاول نساعد في اننا نحافظ على نفسنا وعلى اللي حوالينا، بس احنا دلوقتي ك أهالي لمعتقلين ازاى نحافظ على نفسنا وعلى اخواتنا من العدوى؟ الزنزانة الواحدة تقريبا حسب اللي عارفاه فيها من ٨ ل ١٨ شخص في مساحة صغيرة، ده مش تجمعات؟ دول مش ممكن يصابوا بالفيروس في اي وقت؟ ده لو واحد بس في السجن شغله هناك مش مسجون بس اتصاب السجن كله بالمساجين باللي شغالين فيه بأهاليهم وجيرانهم هيروحوها فيها، وهنا مش بتكلم عن أهالي المعتقلين، بتكلم عن أهالي الناس اللي شغالة في السجن، ولو الناس دي اتصابت هتلاحقوا تعالجوا الأعداد دي كلها! هتقدروا على المصابين وعدد الناس اللي برة واللي جوة! ولا هتدوا العاملين في السجن كلهم اجازة وتقفلوا السجن كله على المساجين من غير اكل ولا ماية؟ اكيد لا

طيب هتفضلوا مانعين الزيارة عن الأهالي لغاية ما الخطر يروح؟ اكيد لا برضه عشان محدش عارف الخطر هيروح امتي وحرام تمنعوا عن المعتقلين وأهاليهم انهم يطمنوا على بعض طول الفترة دي، وحرام يتمنع عنهم الاكل والماية النظيفة والادوية والمنظفات في اكثر وقت محتاجينها فيه، من حقنا ناخذ اخواتنا في حضننا ونطمن ببعض ونعدي الأزمة دي سوا كلنا على خير ان شاءالله، مينفعشي نبقي كويسين وطبيعيين واخواتنا عُرضة للإصابة بفيروس خطير زي ده واحنا بُعاد عنهم مش عارفين نحافظ عليهم او نعملهم حاجة!

بتكلم هنا عن المحبوسين احتياطي، عن السياسيين وسجناء الرأي، رغم ان اي بني ادم في المطلق ليه حق الحياة، الموضوع دلوقتي في ايديكم انكم تحاولوا تتجنبوا جزء من انتشار المرض انكم ترجعوا المعتقلين لأهاليهم ويقفلوا عليهم بيتهم، خلوا اخواتنا يبقوا مسؤوليتنا مش مسؤولياتكم، كل أسرة تحمي ولادها بنفسها ونخفف العبء عنكم شوية، خصوصاً لو المعتقلين دول لا يمثلوا اي خطر من اي نوع.

<http://bit.do/fBoCH>

عن عمرو عزب

العجز والقهر اللي جوايا بيقتلني كل شويه
انا مش عارفه حاجة عن ابني واكيد امهات كتير كده القهر والظلم اللي عايشينه
والقلق والرعب على اولادنا بسبب الفيروس المنتشر
سامحونا يا اولادنا سامحونا وظننا بالله انه هيجبر كسرنا ويرحم ضعفنا ويحفظكم
من كل شر ويبعد عنكم الامراض وسئ الاسقام
ربي يحفظك يا ولدي ويبعد عنك كل الامراض ويمتلك بالصحة والعافية ويبعد
عنك سئ الاسقام

<http://bit.do/fBnhV>



محمي

تعذر نقل معظم المُتهمين الي نيابة أمن الدولة اليوم، سجن القناطر نقل المُتهمين الي النيابة ولم يتم نظر جلسات تجديد الحبس أيضاً. وفي الغالب هيتم التجديد لجميع المُتهمين عن طريق عرض الاوراق فقط دون حضور المُتهمين أو محاميهم. الوضع صعب جداً زيارات مقفولة وجلسات مُعلقة، ومش عارفين الاهالي تتصرف ازاى ولا احنا كامحامين نتصرف ازاى في الوضع ده!

<http://bit.do/fBooF>

عن معتر ودنان

وبعد ٧٦٠ يوم من المنع من الزيارة و ٧٦٠ يوم حبس احتياطي مر فيهم معتر بشتى أنواع التنكيل ومع انتشار وباء كورونا الواحد بقي خايف ان ممكن يحصل حاجة ليه او لحد لينا من غير مما نشوفه ويكون معانا. معتر قضى ٧٦٠ يوم في مكان قذر جدا لدرجة أن اول طلب كل المساجين بيطلبوه ميه. ٧٦٠ يوم في زنزانه لوحده تماما في طرة شديد الحراسة ٢ ودول ناس بتتفنن في اي حاجة تمنعها وتتعتت بيها اي مسجون رأي. ٧٦٠ يوم ضاعوا وبيضيع اكثر منهم بسبب أنه عمل شغله. ٧٦٠ يوم حرمان من أولاده علشان عمل حوار صحفي. معتر والي زيه مش مجرمين علشان يحصل فيهم كل ده دول صحفيين ودكاترة، معتر قضى ٧٦٠ يوم محبوس ظلم في ثلاثة ٤٤١ اللي معظم اللي فيها اخلاء بتدابير وكثير اتلغى ليه التدايير. ومعظم اللي فيها محبوس في استقبال وتحقيق اللي بيسمح بزيارات أسبوعية. معتر الوحيد اللي في ٤٤١ بيتم معاملته بطريقه خاصة بتزيد التنكيل بيه والظلم ليه ولينا .. يعني حتى مفيش عدل في الظلم 😊



اظن كدة كفاية .. خرجولنا معتر

<http://bit.do/fBnCQ>

عن ا. ابراهيم متولي

النهارده كان ميعاد تجديد والدي ... لكن مش جه من السجن و إتجدد له علي الورق انا بالنسبة ليا عادي مش مهم اشوفه ، بس المشكلة اللي بتعذبني إن هو بيأكل إزاي وعایش جوه إزاي في الظروف اللي زي دي مع الحرمان من الزيارة ، إنتم عارفين أيه الغريب إن فيه ناس بتزور من ورا إزاز ايوه بعازل طب الناس دي أيه سبب منعهم من الزيارة والزيارة مش تتقسم كشوفات ليه علي المساجين وكل واحد يقول لأهله في رساله ميعاد زيارته وكل مره عدد محدود لتجنب مخاطر العدوي ... زي ما الدولة بتحافظ علي الرعايا بتوعها المساجين من رعاياها ولا مش تبع الدولة ولا ايه بالظبط ... طب حفاظاً علي الصحة العامة تعزل إنسان انت أصلاً عازله والحرمان في أبسط حقوقه اللي هي التريض مثلاً والتعرض للشمس ... الدولة في إيدها حلول كتير لكن زي ما الفترة اللي قضتها في السجن كان فيه ظابط بيقولنا انتم جاين هنا علشان نموتكم بالبطى بدون أي مقدمات يعني التنكيل والتعمد في إنهاء حيوات أشخاص بالشكل دا وبالصورة دي مرعب بمعنى الكلمة ... للأسف الدولة بتناقض نفسها في أكثر من موقف يعني ايه تعلق الجلسات ويعني ايه تمنع زيارات طب انت قدمت ايه لهم علشان ترعاهم ياريت أي مسئول يطلع يقول لنا أيه التدابير اللي أخذها في حقهم وبموجب أيه ولا هو بتستغل الفرص ضد أشخاص سلموا قدرهم للقانون وأنت قبل كدا موقفك معاهم سلبي بمعنى الكلمة يعني الحرمان من الكشف الطبي وقبل كدا حرمان من الزيارة فيه ناس بتفرح انها خارجة جلسة علشان تشوف الشارع والحياة عامله ازاي طب دول دلوقت هتعمل فيهم ايه وحياتهم هتبقى ازاي مجرد انهم شافوا الشارع بياخدوا أمل بسيط إنهم يخرجوا فيه قصص كتير مرعبة وللأسف مفيش قرار عادل إتأخذ في حقهم لغاية دلوقت ،،، والتكديس اللي ف الإقسام والسجون حله ايه الموضوع كبير وأكبر من إن الدولة تفضل متحفظة عليهم لأن الموضوع كارسي ،،،، وليه الدولة مش بتستخدم الأجهزة اللي جات من الصين وتكشف علي المساجين وتعقم الزنازين وتعقم الحاجات اللي بيتعمل فيها اكل لهم والميز ... الدولة لازم ولابد والسيد النائب العام لازم ياخذ قرار حاسم في الموضوع ويخرج المحبوسين احتياطيا علي الأقل بالتدابير اللي يراها مناسبة في حين ان أنا شخصياً لو حب ياخذ عليا تعهد هنفذه بدون تفكير لكن سلامة والدي مهمة بالنسبة ليا ولنا كأسرة ... أما المختفين فوضعهم لايعلمه إلا الله وربنا يصبرنا ويرجع الغائبين كلهم .



<http://bit.do/fBozZ>

عن محمد عبد الغني

يعني كثير علينا يارب نعرف أخويا أخباره ايه وسط وباء صحي الناس بتهرب منه في كل شهر في الأرض! ١٣ يوم معندناش أي أخبار، أخرهم كان بيكح وتعبان وطالب كومة أدوية وديتول ومطهرات، وهو مريض حساسية صدرية وبيعاني مع كتمة الزنزانة وحريقة السجاير. مش كثير حقنا البسيط كأهالي نعرف ابننا فيه ايه وندخله أكل مناسب ومنظفات وأدوية مناسبة. فضلاً عن الضرورة الملحة انه يقضي فترة العزل وتحجيم العدوي في بيته، في مكان يسمح انه لا يعدي ولا يتعدى

#Free_Abdulghani #الحرية_لعبدالغني #Corona_outbreak #LetPrisonersOut #covid_19

#خرجوا_المساجين

<http://bit.do/fBoXZ>

عن ا. هدى عبد المنعم

عرض ماما اتاجل عشان القضاء خايف من كورونا طب واحنا خايفين على امانا طلعوها وخذو اجازات براحتكو وارحموها وارحمونا كلنا..

<http://bit.do/fB89j>

عن ا. محمد الباقر

جنان رسمي إننا ما نعرفش أي حاجة عن المسجونين .. يعني إيه معرفش جوزي تعبان ولا كويس .. وأنا عارفة إنه ممنوع يستخدم أي منظفات فيها كحوليات وممنوع يطلع الشمس وممنوع يستخدم مايه سخنة يستحمي بيها أو يشرب أو ياكل أي حاجة سخنة .. صفر تعقيم .. عايش في ظروف تكسر أقوى مناعة .. اللي بيحصل ده جنوني تماماً .. مفيش ولا زيارة ولا تليفونات ولا جوابات .. كأنه فجأة اختفى كمواطن وكإنسان .. اصبح منعدم الحقوق .. كابوس يومي مستمر والله

#فيه_وباء_خرجوا_السجناء.#الحرية_لباقر

<http://bit.do/fCJt2>

عن ا. زياد العليمي

مافيش زيارة ومافيش استلام اكل في السجن!! مسموح بس بتوصيل أدوية، والنهارده كان آخر يوم في قبول أمانات فلوس، بعد كده اللي عايز بيعت فلوس عن طريق مكاتب البريد برقم ٣٣١٧١ ذهبي، امانات مسجون لييمان طرة..مش عارفة السجن الثانية بنفس الرقم واللا لأ.. قابلت الدكتورة نادية النمر زوجة أستاذنا الدكتور حسن نافعة كانت رايحة توصل أدوية وفلوس.. ربنا يزيح الكرب ويتقم من اللي ساجنين ولادنا بلا ذنب الاقولة الحق! ويحرق قلوب كل اللي مالهمش في التور ولا الطحين، بس رافضين خروج السجناء!!

#فيه_وباء_خرجوا_السجناء

<http://bit.do/fCJuM>



عن د. ليلي سويف، د. رباب المهدي، ا. أهداف سويف، أ. منى سيف

ماما وطنظ أهداف (خالتي) ومنى اختي ودكتورة رباب المهدي كانوا واقفين قدام مجلس الوزراء بيطلبوا باتخاذ اجراءات بخصوص ازمة كورونا في السجون كانوا عاملين فيديو لايف وضابط اخذ من منى الموبايل ودلوقتي موبيل منى مش بيرد والباقي موبيلاتهم مقفولة ومش موجودين عند مجلس الوزراء.
انا معرفش هما اتقبض عليهم ولا ايه الي حصل انا رايحة دلوقتي في الطريق افهم

<http://bit.do/fCJW>



مرضيتش امشي من القسم غير لما اشوفهم فا في لتنين ستات شرطة طلعوني بالقوة. سحلوني على سلم القسم. بقية عيلتي مقبوض عليهم في قسم قصر النيل.
اظن ان ضابطة منهم اسمها نشوى

<http://bit.do/fCJQ>

مأمور القسم دلوقتي بينكر انهم في قسم قصر النيل جوا مع ان لما كنت جوا ضباط المديرية الي منهم نشوى اكدولي انهم جوا ومستنيين تعليمات الأمن الوطني. انا عارفة انهم جوا وهفضل مستنية على باب القسم

<http://bit.do/fCJLj>

عن ا. هدي عبد المنعم

عدم خروج الجلسات شيء مرعب كانت طريقة التواصل مع المعتقلين في الجلسات وكده شكراً اتقطعت خلاص رعب كل شوية بيزيد ! الحوار مش تهريج ابدأ شاركوا وانكلموا واكتبوا عن المعتقلين متسكتوش ابدأ مش بإيدنا حاجة غير كده.. أهالينا ماجرموش عشان يتاخدوا مننا اصلاً .. ومش هنقف عاجزين ونسيبهم عشان الوباء ياكل فيهم في السجون ! السجون هتتحول لمقابر جماعية لو مخرجوش انشروا وكثفوا النشر محتاجين اهالينا يخرجوا ونظمن عليهم بالله عليكم خرجوا ماما .. خرجوا ماما ماما عندها ٦١ سنة حرام عليكم .. نستودعكم الله . <http://bit.do/fCJAQ>

عن د. وليد شوقي

ليه أتحرم من جوزي سنة ونص، ليه جوزي ميبقاش معايا وأنا في أشد الأوقات حاجة ليه ولدعمه، ليه الظلم ده كله وعلشان إيه الخصومة دي، ليه بقالي أسبوعين مش بشوفه ولا عارفة أخباره، ولا عارفة هو ناقصه إيه ومحتاج إيه، ولا عارفة هو واخذ احتياطاته من الفيروس ولا لأ، ليه لما ممكن تطلع له علشان مصلحتك ومصلحته وصحتك وصحته وصحتنا كنا، وهيفضل تحت عينك برضه بس في بيئة أحسن، ولما المرض يخلص ابقى خده تاني، ليه مبتعملش كده؟! أنا مش محتاجة أي نظرات شفقة من حد يا جماعة لأن ده بيضايقني أكثر، أنا بقول اللي جوايا واللي حاسة بيه يمكن يكون يريح شوية، مش محتاجة غير دعواتكم بس. <http://bit.do/fCJRd>



عن عصام سلطان



من زوجة معتقل.. شاهدة عيان على أوضاع السجون والمعتقلين في مصر:
قضيت أكثر من 6 سنوات على أبواب السجون.. زيارات أو محاولات زيارات وجلسات محاكم أشهد أنا أمام ضمير مصر والعالم: السجون في مصر قنبلة موقوتة.. تكدر.. لا يرون الشمس.. جحافل من ذباب وناموس.. ابجديات نظافة منعدمة.. التغذية ضايعة.. زوجي فقد ٢٥ ك من وزنه مؤخرا... بسبب اغلاق الكانتين والكافيتريا لعدة شهور. ولا يوجد الاطعام التعيين وما أدراك.. انعدام للرعاية الصحية في أي لحظة السجون معرضة أن تصبح بؤرة تنشر المرض للمجتمع كله ولن تفرق بين اتجاه سياسي واتجاه معارض ليه! وفقا للقانون الدولي يجب الإفراج عن جميع المساجين في حالة وباء الدولة.. والإفراج الصحي يشمل الجميع. ادموا حملة الإفراج لكل المعتقلين ناشد منظمة الصحة العالمية بالضغط على مصر للإفراج عن أكثر من 100 ألف معتقل في سجون مصر خوفاً من تفشي فيروس كورونا أحملكم مسئولية حياة هؤلاء السجناء ومسئولية عواقب الوضع الصحي بالسجون وأثرها على مصر والعالم كلنا في مركب واحد! مرة فيروس حاول يعلم الانسان: عيشوا مع بعض أخوة أو موتوا مع بعض كأغبياء! مش عارفة الانسان اقتنع بإيه؟ اللهم هل بلغت. اللهم فاشهد

<http://bit.do/fDtXb>

عن حمدي حمدان مبارك حسن

سيادة المستشار/ النائب العام

مقدمه لسيادتكم محمد حمدي حمدان مبارك

نجل حمدي حمدان مبارك حسن ، المحبوس لانقضاء مدة حبسه بسجن ليما المنيا بمنطقة سجون المنيا الجديده في القضية رقم

2170 لسنة 2016 جنايات دار السلام

2564 لسنة 2016 جنايات كلي جنوب القاهرة امن الدولة علوي

الموضوع:

في ظل تواتر اكتشاف حالات الاصابة بفيروس كورونا (covid 19) داخل مصر واعلان هيئة الصحة العالمية اعتباره جائحة (pandemic) واتخاذ السلطات المصرية اجراءات جذرية مثل تعطيل الدراسة في محاولة للحد من انتشار العدوى عن طريق منع التجمعات، ورغم ذلك لم يتخذ حتى الآن -في حدود علمنا نحن أهالي السجناء- أي اجراء للحد من التكدس في السجون وأماكن الاحتجاز عموما سيادة المستشار، إن أي شخص تعامل عن قرب مع أماكن الاحتجاز في مصر سواء كانت سجون أو حجز أقسام الشرطة أو غرف الحجز بالمحاكم ومديريات الأمن...الخ يعلم علم اليقين أنه يستحيل تماما على المسئولين عن هذه الأماكن ضمان حد أدنى من الظروف الصحية المقبولة بها في الأوقات الطبيعية، ناهيك عن منع وصول الوباء الحالي اليها وانتشاره بها وأود أن أوجه عناية سيادتكم إن الخطر هنا من انتشار الوباء في السجون أو أي من أماكن الاحتجاز لا يحيق بالمحتجزين فقط، بل بكل من يتعاملون معهم من رجال شرطة وموظفين ورجال النيابة والقضاء، ثم بالمجتمع ككل، حيث أن هؤلاء المتعاملين ليسوا محتجزين، بل هم يتحركون في كل مكان بحرية إن الوسيلة الوحيدة الناجحة للحد من خطر أن تصبح أماكن الاحتجاز بؤر لنشر الوباء مما يهدد عموم المصريين هو اطلاق سراح أكبر عدد ممكن من المحتجزين، بحيث تنخفض الأعداد جذريا إلى أدنى حد ممكن، وعندئذ يمكن لباقي الاجراءات الصحية مثل التطهير والفحوصات الدورية وعزل الحالات المشتبه بها...الخ أن تكون فعالة في الحد من أنتشار الوباء والحد من آثاره على من يصابون به. سيادة المستشار من بين المحتجزين او الاغلبية الان من بين المحتجزين هم معتقلي الرأي ، معتقلي الرأي كبار السن مرضي القلب والضغط والسكر معتقلي الرأي الشيوخ والشباب النساء والتي نعلم جميعاً مدي

الخطورة علي حالتهم الصحية والبدنية وما يتعرضون له داخل مقرات احتجازهم الغير آدمية من بين المعتقلين اشخاص عاجزة حتي عن قضاء حاجتها بنفسها من بين المحتجزين أعداد غفيرة من المحبوسين احتياطيا الذين لم يحالوا بعد إلى المحاكمة، لا نعرف عددهم بالضبط لأن سيادتكم ومن يعملون تحت سلطتكم لم تنشروا -في حدود علمنا- أي احصاء عنهم، إلا أنه من المؤكد انهم آلاف وربما عشرات الآلاف، و المختفين قسريا

سيادة المستشار هؤلاء جميعاً مسئوليتكم الشخصية، فقرارات حبسهم تبدأ من النيابة العامة بناء على السلطة التي منحك اياها القانون. قد تأتي قرارات الحبس بناء على تحريات رجال الداخلية، قد تخضع أحيانا لأهواء ما دُرج على تسميته بالأجهزة السيادية، أو كما يشاع ربما القيادات السياسية، الله أعلم، أنا لا اتحدث هنا عن العدالة ففي اللحظة الفارقة التي نمر بها هذا جدل لا يُقدّم ولا يؤخر، وانما أتحدث عن كارثة صحية يقع في نطاق سلطتكم تجنّبنا اياها أو على الأقل الحد منها، وأكرر التذكرة بأن الخطر هنا ليس مقصورا على المساجين.

سلطاتك القانونية يا سيادة المستشار تمكّنك أن تتخذ قراراً بالإفراج عن كل من لم تتم إحالته إلى المحاكمة من المحبوسين احتياطياً والتوصية بالإفراج عن أي مسجون في قضية رأي أو قضية سياسية تحت مسمى قضايا العنف فالوقت لا يسمح بالرهانات على مستقبل جميع تلك الأسر والمساجين والمسؤولين عنهم داخل مقرات احتجازهم نطلب من السلطات الحاكمة الآن للبلاد الإفراج عن جميع المعتقلين بأية ضمانات أو تدابير ترونها، كما يمكنكم أيضا التوصية بذات القرار بالنسبة للسجناء عديمي الخطورة

مثل هذا القرار سيحقق حال تنفيذه خفضا ضخماً في حالة التكدرس الموجودة حالياً داخل أماكن الاحتجاز

مثل هذا القرار بل وأوسع منه اتخذته السلطات في دول أخرى أو هي في طريقها إلى اتخاذه

مثل هذا القرار هو مسئوليتكم التي ستسألون عنها لو تقاعستم عن تحملها ولا قدر الله حدثت الكارثة

تحريرا في ١٨ مارس ٢٠٢٠

#خرجوا_المساجين #في_وباء_خرجوا_السجناء #سجون_مصر

<http://bit.do/fD86F>

عن د. ليلي سويف، د. رباب المهدي، ا. أهداف سويف، أ. منى سيف

دلوقتي احنا لسا مستنيين قدام القسم، دفعنا الكفالة الساعة ٣ الفجر ولسا مخرجوش. امبارح كان الرد اننا مستنيين إشارة الأمن الوطني دلوقتي في إشاعة ان حد من حجز الرجاله عنده كورونا جوا القسم وناس تانية بتقول دا عنده برد عادي. انا معرفش ايه الحقيقة محدش بيدينا معلومات واضحة لكن اللي قدامي ان في قلق، طلعا الامناء يوقفوا برا وفي حالة توتر وفي عربية إسعاف طلعت من القسم. ايا كان اللي جوا دي حالة كورونا ولا برد، اللي بيحصل في أماكن الاحتجاز أقسام وسجون من تكدرس دا كارثة وإهمال في ظل ان العالم بيواجه وباء. يارب تكون دي إشاعة بس احنا قلقانين قلق رهيب ودا بعد ليلة واحدة في قسم، ما بالننا اللي في السجون معرضين لأيه تحديث: شكلها إشتباه مش حقيقي الدنيا هديت عند القسم وافراد الشرطة مبقوش لابسين كمادات (دا شئ مش مفهوم بالنسبالي الصراحة) ورجعوا يقولونا مستنيين إشارة الأمن الوطني..

<http://bit.do/fDtAH>

زوجة

نحن أهالي المعتقلين نخوض حربا لا يعلمها الا الله .. اللهم أنى مسنى الضر وأنت أرحم الراحمين...

<http://bit.do/fDtve>

عن د. ليلي سويف، د. رباب المهدي، ا. أهداف سويف، أ. منى سيف

الدنيا برد اوي في التجمع حاولت ادخل لماما جاكث او بطانية بس هما رفضوا. ماما كدا بقالها ٣٦ ساعة مأكلتش ولا

شريت مياه #FreeAlaa #FreeAlaaFamily

<http://bit.do/fDtYZ>

عن أطفال رهن الحبس

اتمنى النيابة العامة تكون رحيمة بالمحبوسين وخاصة الاطفال، الأمر مرعب والأطفال المحبوسين أعمارهم من ١٥ ل ١٨ سنة وأمهاتهم كل يوم يموتوا من الرعب عليهم، يوميا مكالمات من أمهاتهم لو في اخبار جديدة اطمئنهم عليهم. القضية ١٥٣٠ حصر أمن دولة عليا محبوس على ذمتها اكثر من ٤٠ طفل متوزعين بين قسم عتاقة والعقابية وتخشبية الخليفة، منهم المريض والى والده أو والدته معندهمش القدرة يروحوا يزروه في محبسه، منتظرين فحص أوراقهم وتباين موافقهم وإخلاء سبيلهم


القضية ٤٨٨ حصر أمن دولة عليا محبوس على ذمتها طفلين وكل الاطفال في القضية خرجت الاهما القضية ١٤١٣ حصر أمن دولة عليا والمعروفة بقضية احداث ٢٠ سبتمبر محبوس على ذمتها اربع اطفال، رغم إخلاء سبيل اكثر من ٨٠ طفل على ذمة القضية القضية ١٨٩٨ حصر أمن دولة عليا محبوس على ذمتها ٤ اطفال متبهدلين داخل الاقسام ومنهم المريض والى بيشتغل علسان يصرف على أهله وهو ١٦ سنة

وقضايا ثانية كثير محبوس على ذمتها اطفال منتظرين نص ليهم بعين الرحمة ونرحم قلوب أمهاتهم ويتم إخلاء سبيلهم محتاجين نهتم بكل طفل محبوس سواء سياسى أو جنائى ونحافظ عليهم ويأتوا في بيوتهم وفي احضان امهاتهم قلوب امهات الاطفال بتتخلع على اولادهم ارحموا الاطفال والأمهات وافحصوا أوراقهم واخلوا سبيلهم.

#الحرية_للاطفال

<http://bit.do/fD88a>

في عيد الأم مسنة تناشد وزير الداخلية الافراج عن ابنها مراد نبيل مختار عبد الحق



السيد اللواء / وزير الداخلية
تحية تقدير واحترام . وبعد
مقدمة لسيداتكم السيدة / سعادتي رمضان سرور . - بالمعاش - 78 عاما
والمقيمة بالرقازيق - شرقية .
والشرف بعرض الاتي
حيث تم الحكم علي نجلي المسجون / مراد نبيل مختار عبدالحق
من محكمة جنايات الرقازيق - وذلك بالحكم الصادر بجلسة 2016/2/24 في
القضية رقم 7698 لسنة 2012 قسم اول الرقازيق والمقيدة برقم 1352
لسنة 2012 كلي جنوب الرقازيق.
وهو الحكم القاضي في منطوقه ب " بمعاقبة المتهم بالسجن المشدد لمدة
سبع سنوات .
- وحيث قام المتهم بالوفاء بالالتزامات المالية الواردة بالحكم وقام بسداد كامل
المصاريف الجنائية .
- وحيث ان بداية تنفيذ العقوبة المذكورة كان من تاريخ القبض عليه والحاصل
في عام 2015 .
- وبذلك يكون ابني قد قضى مايزيد على ثلاثة ارباع المدة المحكوم بها
بمحبسه بسجن ملحق وادى النظر (برقم 9144) .
- وقد تجاوزت فترة الحبس التي قضاهها نجلي اللأثرة المقررة بموجب المادة
السابقة .

والتي كام مسنة ومريضة وبين الحياة والموت ولا افرق حتى على زيارته ..
ويزنني بغضاه الله وقدره . فقد تحملت الكثير منذ ان حل هذا الازلاء عليا
جمعيا .
وحيث ان المواد المتعلقة بالافراج الشرطي قد فتحت باب الرحمة والامل في
اعادة النمام شمل الأسرة وان تقر عيني بوجود ابني زاعيا وسندا لي في ابني
الاخيرة .
وحيث تنطبق كافة شروط الافراج الشرطي علي نجلي ..
لذلك
الرجاء من سيادتكم اتخاذ اللازم نحو اصدار قرار بالافراج الشرطي عن
المحكوم عله / مراد نبيل مختار عبد الحق ، المحبوس حاليا بسجن
ملحق وادى النظر (برقم 9144) نافذا للحكم الصادر بجلسة
2016/2/24 في القضية رقم 7698 لسنة 2012 قسم اول الرقازيق
والمقيدة برقم 1352 لسنة 2012 كلي جنوب الرقازيق
لقضائه اكثر من نصف فترة العقوبة المحكوم بها . ولسوء حالتي الصحية
واحتراجي لرعاية طبية خاصة نظرا لكبر سني ، ولاستيفاء كافة الشروط للافراج
عنه شرطيا .
وفلكم الله دوما لما فيه الحق والعدل والانصاف
وتفضلوا بقبول وافر الاحترام والتقدير
مقدمة لسيداتكم
سعدتي رمضان سرور . - بالمعاش - 78 عاما
والدة المسجون / مراد نبيل مختار عبدالحق

<http://bit.do/fD9uS>

زوجة أحد المعتقلين:

السلام عليكم

أكتب هذا المنشور معذرة إلى الله

يا أهل مصر

قد ألبسنا الله منذ سنوات معدودة لباس الجوع والخوف إلى أن وصل الآن الأمر منتهاه ، وتحذر الآن كل السفارات رعاياها في مصر مغادره البلاد لانها مقبله على كارثة محتمه

يا اهلنا

تخافون على انفسكم وأبنائكم وأزواجكم وهم بينكم وفي أحضانكم، الا تسألون انفسكم كيف حال اهالي المعتقلين الذين يفوق عددهم الـ ١٠٠ الف معتقل: كيف حال هذه الاسر؟ انا كزوج معتل أحكى لكم:

نحن نعيش أياما سوداء قلق وخوف ورعب على أزواجنا وفلذات اكبانا ونموت في اليوم مئة مره وأنتم تعلمون جميعا أنهم ليسوا بمجرمين ولا إرهابيين هم من خيرة أهل مصر شاء من شاء وأبي من أبي يا أهل مصر وأنتم تعلمون جميعا أن بيئة سجون مصر هي راعيه للأمراض وحاضنة لها يا أهل مصر خذلتمونا ألف مره ومره ولم تنصروا الحق وآثرتم الحياة على الكرامة وهذا شأنكم وخياركم اما ان الاوان ان تنصروا الله فينا وفي بلدكم هذه المرة ان يخرج السجناء اصحاء خير الف مره من خروجهم مرضى فالكارثة ستعم الجميع (واتقوا فتنه لا نصيين الذين ظلموا منكم خاصة)

اتقوا الله في المظلومين وأسرهم شاركونا وقولوا قولة حق وشاركونا النداء بالإفراج عن المعتقلين قبل وقوع ما لن يحمده الجميع

الله الله في المظلومين

الله الله في الاسرى

ارجوا مشاركته المنشور من الجميع وجزاكم الله كل خير

#طلعوا_المعتقلين

#خرجونا_فيها_كورونا

<http://bit.do/fETc6>

عن المعد التلفزيوني أحمد عز

بتاريخ ١٦ مارس أرسلت والدة المعد التلفزيوني أحمد عز تلغراف بعلم الوصول الي كل من:

السيد المستشار/ النائب العام _ تلغراف رقم ٢٥٧٢١٠٨٦٤

السيد المستشار/ المحامي العام لنيابات أمن الدولة _ تلغراف رقم ٢٥٧٢١٠٨٦٢

السيد المستشار/ المحامي العام لنيابات شبرا الخيمة _ تلغراف رقم ٢٥٧٢١٠٨٦٣

وذلك علي خلفية القبض علي ابنها وقره عينها وحبسه علي ذمة القضية رقم ١٣٣٨ لسنة ٢٠١٩ حصر أمن دولة عليا، تحدثت والدة المعد التلفزيوني أحمد عز بقلبها المكلم فراقا علي عائلها الوحيد لما يزيد عن ١٨٠ يوم والمودع بسجن بنها العمومي، وشرحت كيف تعاني من ألأم الفراق في ظل منع الزيارة عن جميع السجناء، تحدثت حتي كادت أن ينخلع قلبها من مكانه رعبا من وباء الكورونا، فكيف لها أن تواجه وحدها ظروف لا يعلمها إلا الله، واختتمت حديثها بطلب إخلاء سبيل قره عينها وعائلها الوحيد بأي ضمان تراه النيابة العامة حفاظا علي تماسك أسرته وصيانة مستقبل أفرادها...



كما أن أجدد طلبي ومناشدتي، وكثيرا ما كنت أرددها سواء أمام السادة المحققين أو

السادة المستشارين أثناء جلسات تجديد الحبس، وهو إصدار أوامركم الكريمة بإخلاء سبيل المتهمين الذين لم يتورطوا في أي أعمال عنف علي سيادتكم أن تضعوا انفسكم مكان أسر السجناء الذين حرموا من حقهم في زيارة أولادهم وأحبائهم، هؤلاء قبض عليهم نتيجة للتوسع في وضع الأشخاص داخل دائرة الإشتباه، لذا يجب أن تتدخل يد العدالة لتصحيح الخطأ وأن ترد الأمور الي موضعها كما أود أن ألفت عناية معاليكم أننا في أمس الحاجة للشعور بالعدالة، البشرية في صراع مع وباء الكورونا اللعين، البشرية تواجهه كرب ومحنة يتطلبوا أن يكون أفراد كل مجتمع متماسكين متشاكين كالبنيان المرصوص ويخرجوا أفضل ما فيهم بتفاني تام دون أي نوع من أنواع الأنانية ضيقة الأفق، لكي نمر يجب علي الجميع أن يغسل إساءته.

<http://bit.do/fESxn>

عن ا. محمد الباقر

النهاردة وأنا بسبب لمحمد حاجته في الأمانات، اترفض دخول التالي!!!!

-كلوركس

-ليفة جسم

-فرشة أسنان

-كمامات وجوانتيات

-وايبس ديتول

أنا حقيقي مش قادرة أفهم ليه، والإجابة اللي بتتقالي "لما تفتح الزيارة دخلي اللي إنت عايزاه"!!! كأني جايباله تورتة مثلاً! كأن المسجون مش مواطن بيتطبق عليه تعليمات وزارة الصحة الخاصة بالنظافة والحماية من الفيروس.

ومفروض يفضلوا قافلين عليهم بالشهور بدون أي نوع من أنواع التواصل لحد ما يفتحوا في الآخر ونكتشف مين عايش ومين مريض ومين مات؟!؟!#

الحرية_لباقر

<http://bit.do/fESLH>

ممکن مصلحة السجون تنزل بيان فيه الخطوات اللي بتحمي فيه المساجين من كورونا، زي مثلاً إنهم يقولوا: إنهم بيعقموا الزنازين ٣ أيام في الأسبوع، ومسموح مثلاً للمساجين شراء الكحول المطهر والكلوركس من الكانتين، ويقولولنا الأكل بيتعمل ازاي وبيتسلم للمساجين ازاي، واللي بيتعاملوا مع المساجين بيبقوا لابسين ايه ومعقمين نفسهم ازاي، واللي بيشكي من أعراض بيتكشف عليه ازاي، وبيتبلغ اهله لو فيه إصابة ازاي، وهدومهم بتتغسل ازاي، الخ شوية تفاصيل كذا وشوية شفافية، ما تأذيش أي حد، وما تنتهكش أي خصوصية أو أي أمنيات، وما تسببش أي ضرر لأي حد. لكنها إجراءات طبيعية باعتبارهم بني آدمين ومواطنين وليهم حقوق وليهم أهل.

الحرية_لباقر

<http://tiny.cc/cz2tlz>

رسالة إلى باقر .. لو كان مسموح بجوابات في الأوقات العصيبة الحالية .. كحد أدنى من التواصل الإنساني: بعد السلام والمحبة والأشواق (: واحشني جداً جداً جداً .. نفسي جداً أشوفك واسمع صوتك .. واشوف ضحكتك منورة وصوتها مجلجل .. كان نفسي نبقى مع بعض والوباء بيكتسح العالم .. آخر دراما كنت اتوقعها إن كل واحد فينا يبقى معزول عن الثاني وما يعرفش أي حاجة عنه..

كان نفسي اجهزك من مجاميعه (: جوانتيات وماسكات وترموترات حرارة واغرقك كحول وكلوركس وفاكهة وخضار وكل حاجة في الكون بتقوي المناعة .. حاولت وفشلت والله.

احنا كويسين الحمد لله وصحتنا كويسة .. والعملية الصغيرة اللي عملتها عدت بسلام الحمد لله .. فايتك حالة الهلع على مستوى العالم وكمية قلشات المصريين .. أنا بشتغل من البيت .. وبابا لسه جزء شغال .. عجلة الرأسالمالية الطاحنة منعاه يوقف كله (: والباقي كله بيشغل جزئي من البيت .. والعيال قاعدين من المدارس في البيت .. وما ادراك ما قاعدة البيت للعيال (: بنحاول نستعد لأفلام الرعب بتاعة كورونا لكن من غير ما نعبي عربيات السوبر ماركت والأفلام دي (: بابا ما كانش عايز نجيب كيس مكرونة واحد حتى ازيد من العادي .. عشان مصلحة الناس والوطن والمثل العليا وكذا القطط كويسين لكن الرمل بدأ ينقص في السوق فربنا يستر .. أصل دي حاجة ما ينفعش نعرف نتصرف فيها):

على بالي كل دقيقة في اليوم، كأنك قريبي والله (: بصحي وبنام معاك (: موضوع "اقعد في البيت" بيخليني افكر اننا كلنا مخنوقين منه، فما بالك أنت بقالك كذا بالشهور، وزيادة على كذا مش بتشوف حد ولا الشمس ولا بتقرأ ولا بتدخل على الانترنت ولا بتتفرج على التلفزيون ولا تسمع الراديو، ولا اكل نظيف من البيت ولا حموم بمائة سخنة ولا فنجال قهوة، بجد ربنا يعينك، معجزة إنك محافظ على قواك العقلية والله، عشان إنت بني آدم جميل جداً كل الناس بتحلم بيك وبيعتولي إنهم حلموا بخروجك .. وهموت واحلم زيهم لكن ولا مرة حلمت بخروجك .. معرفش ده عشان أنا شخصية تشاؤمية ولا ايه التفسير العلمي للموضوع):

عايزاك تستثمر وقتك جوا السجن في إنك كل يوم تقعد تفكر ازاي هاسعد مراتي لما اخرج، وهخرجها فين، وهجبلها هدايا ايه، وهفرجها على أفلام ايه، وهطبخلها ايه (: هيه دي الحاجات المفيدة اللي هتفيدك في مستقبلك):

خد بالك من نفسك يا حبي، وتماسك واصمد كدا لحد ما تخرجلي بالسلامة ونحضر نهاية العالم مع بعض (:)

حبيبتك ورفيقتك ومراتك نعمة ♥

#الحرية_لباقر

<http://bit.do/fFrJP>

عن أيمن موسى

في ناس كتير قوى قاعدة تكتب عن الملل و الزهق و كده عشان محبوسين في البيت. مش لاقيين حاجة يعملوها. تخيلوا بس دقيقة واحد مسجون من 7 سنين مثلا زى أيمن و هو بيقرأ بوست كده مثلا و هو قاعد في ده بقاله 7 سنين مع فرق بسيط شوية انه معهوش لانت ولا لاب توب و لا كورسات أون لاين و لا أهله في البيت ولا تليفزيون ولا أى حاجة حرفيا غير مخه و يمكن كتابين مهربهم و 17 ألف بنى ادم نايمين فوقيه و مجموعة لطيفة من الأفكار السوداوية البائسة. ممكن تحسوا بتغير بسيط لرؤيتكوا للوضع اللي انتوا فيه و مدى مأساويته.

<http://bit.do/fFrLQ>



عن ماهينور المصري

في خلال ٦ ساعات بس قرئت عن ٥ حالات وفاة بسبب الكورونا.. مخي مش قادر يبطل تفكير في ماهي وكل المساجين اللي بقوا معزولين عننا احنا بس الموضوع بيكبر و مفيش اي طمأنينة و قلبنا وجعنا عالناس اللي جوة خلاص، بجد لو حد واحد بس اتصاب يبقى كدة كل المساجين اللي جوة اتصابوا حسوا بخطورة الموقف شوية، حسوا بالمسئولية اكثر من ربح المساجين محبوسين احتياطي على ذمة تحقيقات طلعوهم بدل مافي كارثة تحصل #فيه_وباء_خرجوا_السجناء

#الحرية_لماهينور_المصري

<https://bit.ly/33Hyx1>



ا. إكرام يوسف

#فيه_وباء_خرجوا_السجناء
لواء ثاني في الجيش توفاه الله بكورونا ربنا يرحمه ويصبر أهله، اسمه شفيع عبد الحلليم داود، بعد اللواء خالد شلتوت ربنا يرحمه ويشفي ابنه، ومستشفى الشروق في الهرم قرئت بوست بيقول انهم قفلوها لظهور حالات فيها، ومستشفى سعاد كفا في اكتوبر دخلها مريض وبعد ظهور أعراض كورونا عليه أخذوا منه عينة وبعثوها لتحلل فطلع إيجابي، بعدما اختلط بعدد كبير من الأطباء وطاقم التمريض!! مستنيين ايه؟ السجون اكيد مش اكثر نظافة من المستشفيات، والوباء مش حيفرق بين مسجون وعسكري ولوا، انسوا شهوة الانتقام من المعارضين

شوية وحكموا العقل. <https://bit.ly/2JdYvLQ>



عن د. وليد شوقي

خرجوا المساجين يا جماعة، خرجوا مساجين الرأي اللي مش متورطين في عنف، خرجوا اللي حبستوهم لمجرد خصومة سياسية، ارحمونا من الرعب اللي مسيطر على حياتنا وهيموتنا بالبطئ قبل نموت بكورونا، لا احنا ولا هما عارفين حاجة عن بعض، احنا في مركب واحدة مش وقت أي خصومة والله، لما مسجون هيتصاب هيصيب عسكري وبعدين ضابط وبعدين لواء، ليه نوصل للسياريو ده، خرجوهم وخذوا أي ضمانات، اعملوا لهم إقامة جبرية في البيت، وهما اصلا مش هيتحركوا، خرجوهم نقضي الباقي سواء، واحنا اصلا هنكون محرومين من حضنهم والقرب منهم، فمتقلقوش كأنهم في السجن بالضبط، بس هنكون على الأقل شايفنهم قدام عيننا!

<https://bit.ly/3bnXfSh>

عن شادي أبو زيد

هو ازاى طيب في الظروف دي اقعد في البيت وأخلي بالي من ماما ومن نفسي وانا مش عارفة اطمئن على اخويا! اخويا قاعد في اوضة صغيرة فيها اكر من ١٠ بني ادمين وبيتعاملوا مع أمنا شرطة وظباط بينزلوا الشارع ووارد يتعدوا من اي حد بأي شكل ويرجعوا يعدوا الزنازين! ما تطلعوا اخواتنا يتحبسوا في البيت معانا بدل شحنة القلب دي ومعدومي الرحمة اللي بيقولوا هما كده احسن ليهم، يارب اشوفكوا قاعدين مكانهم يارب وأهلكم مقطعين نفسهم عليكم آمين يارب

#شادي_ابو_زيد

#خرجوا_السجناء_البلد_فيها_وباء

<https://bit.ly/2Uedpr>

عن عبد الناصر اسماعيل

اللي بيحصل تجاه المساجين ده إجرام وقتل عمد، اللي بيحصل ده مش عقاب. ليه مانعين الزيارات ولية مفيش أي طريقة نطمئن بيها عليهم، وياريت حتى في الزيارات اللي من على باب السجن بياخدوا الحاجات كلها اللي تساعد في التطهير ويبقى أضعف الإيمان حتى.. كل ده ملوش إجابة في دماغ غير أنهم بيقتلوهم وقاصدين وواعين لده كويس وأن في دماغهم دول مش بني آدمين لهم حق في الحياة دول مجرمين سواء سياسيين أو جنائين وعادي المجرمين يموتوا عادي.. مشاعر العجز والألم دائمة ومفيش هروب منها ومفيش أي طريقة أو أي حاجة ممكن عملها تخففها أو حتى تقلل الخطورة للناس اللي جوه، أو وقف السيناريوهات السيئة اللي بتيجي وبنفكر فيها.. يعني اصلا كنا طول الوقت قلبنا واكنا واحنا بنعرف نشوفهم كل أسبوع ونطمئن عليهم ونشوفهم محتاجين ايه، دلوقتي مفيش أي وسيلة نعمل ده. كل مسئول وكل شخص مشارك في اللي بيحصل ده شريك في الجريمة، ربنا يحرق قلوبكم على حرقه القلب كل واحد وعجزه تجاه قرايبه او حبايبه او صحابه اللي جوه..



#في_وباء_خرجوا_المساجين

<https://bit.ly/2WJjfm>

عن ا. محمد الباقر

اطالب بجد ان يتسمح نبعث فاكسات للمعتقلين .. نطمئنهم اننا عايشين .. وبكدا يضمنوا ان الجوابات مش متفيرة .. وتراجع من إدارة السجن .. والمعتقلين يردوا علينا بفاكسات بردوا .. الموضوع محتاج ساعة واحدة حد بس يفكر ويهتم وينفذ .. ويعتبر المعتقلين وأهلهم مواطنين ليهم حقوق ومن حقهم يطمئنا على بعض ويطمئنا إن أهلهم بخير وعايشين .. وده هيققل الضغط النفسي على المعتقلين وأهلهم بصورة رهيبه .. بدل ما نتجنن كلنا كفاية إنكم حابسين محمد على ذمة التحقيق بالشهور .. وانتم عارفين انه مش هيهرب من بيته ولو طلبتم من محمد يحضر للتحقيق في أي وقت هيحضر .. والبلد فيها حظر تجوال ومنع طيران .. وبالرغم من ده محبوس وحياته متعرضة

للخطر كل ساعة .. على الأقل نطمئن عليه ويطمئن علينا .. ليه حقيقي معتبرين الموضوع مش مهم للدرجة دي!!! ليه حقيقي بتكسروا فينا كلنا وتقهرونا كل يوم بدون أدنى مبرر .. كل اللي محتاجينه شوية آدمية .. مش بقول عدل .. لكن بقول شوية آدمية اللي الناس مخلوقة بيها وقلوبها بالفطرة بيتحرك بيها!
#الحرية_لباقر

<https://bit.ly/2Jb8wJp>

صباح الخير يا محمد

يا رب تكون كافتريا السجن فاتحة .. ويا رب يكونوا بيعملوا أكل نظيف وصحي واللي ببطبخوا مركزين في التعقيم والنظافة يا ترى بتلاقي كل اللي عايزه في كانتين السجن؟ يا ترى عرفت تشتري فرشاة أسنان وليفة وصابون وشامبو؟ حاولت والله ادخلك فرشاة أسنان وليفة وفشلت، يا ترى عندك عيش وجبن نظيفة؟ ولا يتجوع احياناً؟ يا ترى عندك مناديل وحاجات تنظف بيها ولا الزنانة حالتها صعبة؟ أنا مش عارفة بتغسل وتنشر حاجتكم كلكم ازاى جوا الزنانة! أنا عارفة الرطوبة بتتعب عظمك وصدرك، يا ترى صعبتوا عليهم وحنوا عليكم وادوكم مراتب ومخدرات؟ يا ترى بيطلعوكم تشوفوا الشمس؟ يا ترى بتاخذ أدويةك ولا عندك نقص في حاجة؟ يا ترى عارف تشتري مايه ولا بتشرب من مائة السجن؟! أنت اصلاً الكلى مش ناقصة، كفاية الحساوي الصغيرة اللي عندك، يا رب يكون العلاج جايب نتيجة معاه .. يا ترى عارف أي أخبار عن اللي بيحصل في الكوكب؟! يا ترى فيه حد منطقي في السجن سمحلكم بجرنال الأهرام عشان تعرفوا اللي بيحصل! ولا هتتجنن من قلة المعلومات وتعرف بس إننا عايشين من الأدوية اللي بتدخلك .. ناقص آخر كام كبسولة ماكنة قهوة من اللي جبتهملك في عيد ميلادك :) مش هستعملهم وهسيبهم ليك لما تطلع .. يا عالم هيكونوا موجودين ولا هيبقوا انقرضوا.. تماسك واحتفظ بقواك العقلية قبل البدنية على اد ما تقدر .. وكله هيعدى إن شاء الله ولو عيشنا وربنا رزقنا بعيال هتبقى أنت اكيد مسؤول الحكايات الأول :) هنعمل فيها شوية تغييرات حسب المرحلة السنوية .. لكن اكيد هتبقى معدية خيال أي كاتب!)

#الحرية_لباقر

<https://bit.ly/2UyaQiU>

عن أحمد ومحمد حسن مصطفى

في الحقيقة انا مش خايفة من الفيروس كانورهان بس خوفي الأكبر علي محمد واحمد قلبي بيتنفذ ويتفزع مجرد مبفكر هما عاملين اي ولا حالهم ازاى بحس ان قلبي بيقف كل ما يحاول اتخيل الوقت الي عدى علي أحمد والله أعلم بيعدى ازاى علي روحه وقلبه وعقله احنا بقالنا اسبوعين وهنتجنن هو يا قلبي بقاله سنة معزول عن كل حاجة واي حاجة مبعرفش اي الي بيحصل، مش عارفين هو كويس اصلا ولا لا يقولوا العالم ممكن ينتهي لوهينتهي سيبونا سوا مع بعض رجعولي اخواتي الاتنين ولو هنموت نموت واحنا مع بعض وفي حضن بعض سيبونا نلملم نفسنا ونداوي روحنا ببعض. كفاية كذا حبس واختفاء ووجع وفريقه



#احمدحسن_فين؟!

#الحرية_لمحمد_حسن

<http://tiny.cc/3urzlz>

عن شادي أبو زيد

مش انا بقالي سنتين بهاتي في موضوع شادي وفي عدم ادمية الوضع اللي هو فيه؟ اقسام بالله اكتشفت بعد "الحجر" اللي هو كمان مش الزامي، اني فعلاً معرفش حاجة. اقل من اسبوعين حبسة في البيت وحاسة اني خلاص بشد في شعري، دا كدة وأنا الحمد لله في بيتي ومعايا موبايلي ولاب توبي وكتبي وأهلي وعندي امكانية اني انزل الشارع، و مواعيدي ملكي انام وقت مانا عايزة واصحي وقت مانا عايزة، ادويتي

معايا و ديتولي وكحولي، وصحايي علي بعد مكالمة تليفون، باكل وقت مانا عايزة وباكل اللي انا عايزاه، بستحمي وقت مانا عايزة وبميمة سخنة، عارفة اتابع اخبار العالم برة وأشوف ايه اللي بيحصل مش معزولة عن الدنيا، اهلي قدام عيني مش قلقانة عليهم ٢٤ ساعة في الظروف دي .. انا اسفة ليك يا شادي ولله، دلوقتي بس فهمت جزء من اللي انت بتعدي بيه بقالك سنتين وفهمت ليه صحتك ونفسيك كانوا من سيء لأسوأ .. ربنا يديك القوة انك تستحمل اللي فاضل ويحزن قلوبهم عليك وعلي أهلك.

<http://tiny.cc/vbszlw>

زوجة د. البلتاجي..

طالبت السيدة سناء عبدالجواد، زوجة المناضل والبرلماني المعتقل محمد البلتاجي، بالإفراج عن المعتقلين في سجون الانقلاب، وخاصة الأطباء والعلماء والصيادلة للمشاركة في مواجهة فيروس كورونا. وكتبت سناء عبدالجواد، عبر صفحتها على فيسبوك: "د. البلتاجي ومعه كثير علماء، أطباء، صيادلة.. كفاءات علمية وخيرة الشباب في السجون. حرمتهم الشعب المصري من أن يقوموا بدورهم في خدمتهم في ظل وباء يفتك بالجميع". وأضافت زوجة البلتاجي: "ارفعوا الظلم عن المعتقلين حتى يرفع الله البلاء.. خرجوا المعتقلين المظلومين".



<http://tiny.cc/3611lw>

عن زياد العليمي

فيه دكتور اسمه طارق الخواص.. تذكروا هذا الاسم جيدا!! رافض المطالبة بخروج زياد العليمي، وشايف ان الخطر على حياته مش مشكلة! لانه شايف زياد نفسه خطر على المجتمع!!.. مش عايزة حد يشتم عشان ده دكتور عسكري، وانتو عارفين العسكر حبايبنا وكده! لكن يكفي الدعاء له ان يجازيه الله ما يستحق، ويكفي زبائنه يعرفوا اسمه ، ويعرفوا مين الدكتور اللي بيتعاملوا معاه، وفكر ان هو واهله عايشين في صوبة وضامن ان الخطر لن يصيبه وان الخطورة على حياة زياد لوحده !! ده دكتور يعني بي فهم، لكن عين السخبط تبدي المساويا.. ومش عارفة هو ايه مدى معلوماته عن خطورة زياد اللي اخطر من الكورونا؟ وايه ممكن يكون موقفه كطبيب لو وقع تحت ايده شخص يختلف معه في الرأي؟؟!! هو أول مارديت عليه حذف تعليقه فوراً ومعاه ردي عليه طبعاً. بس اسمه مش حيتنسي!!

دا دكتور ولازم نعمل له دعاية بين زبائنه، لانه دكتور شاطر وعارف ان زياد اخطر من كورونا!!

ما تنسوهوش في دعواتكم (دعوة بظهر الغيب ابرك من دعوة في العلن) ربنا يديه على قد نيته الدكتور طارق الخواص

<http://tiny.cc/ia11lw>

عن ا. زياد العليمي

ماشفتش زياد من يوم ٨ مارس، وما أعرفش حاجة عن حالته الصحية!! ربنا يدوق اللي رافضين خروجه، سواء مسئولين او مطبلائية، نفس إحساسي ، وإحساس كل اللي في ظروف، في كل لحظة ليل أو نهار من العشرين يوم دول!! وعلى رأي مديحة حسين. "نفس احساسنا بالضبط لا اكثر ولا اقل!!" .. أظن دي ابسط قواعد العدل.. عدلك يارب

<http://tiny.cc/tq31lw>

عن ا. محسن بهنسي

تم الانتهاء من التحقيق مع خالي المحامي محسن البهنسي، في نيابة امن الدولة في القضية رقم ٥٥٨ لسنة ٢٠٢٠ الاتهامات انضمام لجماعة محظورة ونشر واساءة استخدام وسائل التواصل الاجتماعي. والقرار حبس ١٥ يوم منتهى العبث في الظروف الصحية دي ومع وباء بيهدد العالم كله، يبقى هو ده سلوك الدولة في مصر، العالم كله بيفرج عن المحبوسين لسلامة البشر، واحنا بنحبس محامي نقابي معروف وسط زمايله باخلاصه وشغله ومهنيته اي عقل بيقول الكابوس ده لازم ينتهي فورا

<http://tiny.cc/t4g3lz>



عن جعفر الزعفراني

رسالة بتمنى توصل ليك..
يومك طيب يا جعفر احنا بخير الحمد لله عايشين يعني.. قلقانين عليك جدا ومش قادرين نتأقلم.. آمنه امبارح قعدت تبص على صورتك وتعيط وتقول بابا وحشني بس انا هديتها ودعينا ربنا وقولتلها ربنا شايفنا وانت هتيجي قريب سألتني امتي!؟ قولتلها ربنا عارف يا آمنه يارب تكون بخير ومتحاوط بناس رحيمة دعواتكم لجعفر الله يحفظه ويرده لينا ##الحريه_لجعفر_الزعفراني

<http://tiny.cc/h7h7lz>

عن سولافة مجدي

النهاردة روحنا علشان نودى زيارة لسولافة وطبعا كالعادة بيطلع عنينا علشان ندخلهم الزيارة من وقفة في طابور وانتظار وفي الآخر برضو مافيش حاجة بتدخل غير الفلوس والمطهرات والى برضو مش عارفين ولا متأكدين الحاجة بتدخلها كلها ولا لا وفوق دة كله اننا مش عارفين أخبارها ايه جوة كويسين ولا لا الأكل متوفر ويصلح للأكل اصلا ولا لا هل في إجراءات آمان ليهم بتتأخذ للحفاظ على سلامتهم ولا لا ١٠٠ سؤال كل يوم بيدور في بالنا وقلبنا وجعنا من الخوف والقلق عليها من حقهم قانونا مكالمتين في الشهر ايه الضرر من اجراءهم المكالمة خطر في ايه عايزين نفهم اسمحووا لهم بمكالمة علشان نتظمن دى ابسط حقوقهم وحقوقنا. ملناش غير ربنا بندعيه كل يوم ان الكرب يتفك ويخرجوا بالسلامة وكفاية قهر ووجع وهما معموش حاجة ولا غلطوا ولا أجرموا في حق حد ولا حق البلد!

<http://tiny.cc/5mo8lz>